

Siunnersuummut nassuiaatit

## **Nalinginnaasumik nassuiaatit**

### 1. Aallarniut

Maleruagassat arlallit Inatsisartut sulinerannut maleruagassiisut nutarterneqarnissaannik pisariaqartitsineq Inatsisartut Siulittaasoqarfiata ulluni 25. aamma 26. februar 2014-imi, taamatullu aamma 10. aamma 11. januar 2015-imi, isumasioqatigiinnerni oqaluuserisarpaat. Inatsisartut suleriaasianni allannguutissat arlallit kissaatigineqarput, Inatsisartut sulinerata qanoq naapertuunnerpaamik aqqissuunneqarsinnaaneraniq misilittakkat ilanngunneqassallutik.

Tamanna tunngavigalugu siunnersuummi matumaniipput allannguutit aammalu periutsimut atuuttumut erseqqissaatit, tassunga ilanngullugit oqaaseqarnermi piffissaliussat. Aammattaaq inatsimmut allannguutissatut siunnersuutit, pingaartumik Inatsisartuni Naalakkersuisunilu il.il. ilaasortat aningaasarsiaqartitaaneraniq il.il. Inatsisartut inatsisaata allanngortinneqarneraniq Inatsisartut inatsisissaattut siunnersuut (UPA2014/150) ilanngunneqassapput. Tassunga atatillugu Suleriaatsimut ilanngussaq 2 nutaaq ilanngunneqassaaq, tassani sulingiffeqarneq, peqataasinnaannginneq aammalu sinniisussaniq aggersaasarneq pillugit maleruagassat katersorneqarlutillu erseqqissaavigineqarlutik.

Aammattaaq allannguutissatut siunnersuutitut ilaapput inatsisitigut inissisimanerup allanngortinneqarnera, tassunga ilanngullugit Inatsisartuni oqaaseqarnermi piffissaliussat aalajangersimasuut allannguutaat, Inatsisartut ataatsimiititaliaanni ilaasortat amerlassusiisa ilaasortanut tallimanut killilerneqarnerat, soorluttaaq Inatsisartunut ilaasortat atuuffimminnik nammineq piumassusertik naapertorlugu nalunaarsuisarnerannik maanna aqqissuussinerup pisussaaffinngortinneqarnissaaniq siunnersuut.

Taamaattumik naalakkersuinikkut sulineranut aningaasatigut tapiissuteqartarneq pillugu Inatsisartut inatsisaata allanngortinneqarneraniq Inatsisartut inatsisaata allanngortinneqarnissaaniq siunnersuummut (UPA2015/149) saqqummiunneqartumut siunnersuut una aamma atassuteqarpoq. Inatsisissatut siunnersuut taanna malillugu Inatsisartut pinngitsoorani atuuffinnik nalunaarsuiffissaannut atuuffiit pillugit paasissutissiisoqarsimangippat partiinut ilaasortanut tapiissutinik tunniussiumanginnissamut inatsisissatut siunnersuut taanna malillugu periarfissaqalissaaq. Inatsisip allannguutissaa taanna akuerineqarpat ilaasortat atuuffinnik nalunaarsuiffimmut paasissutissiinissamut pisussaaffinngortussap malinissaanut aningaasaqarnikkut kajumissuseqalernissaat qulakkeerneqassaaq.

## 2. Siunnersuummi immikkoortut pingaernerit

*2.1 Qinigaanerup Misilinneqarnissaanut Ataatsimiititaliaagallartup pilersinneqarnera*  
Suleriaatsimi § 1-imi maannamut maleruagassat malillugit nutaamik qinersinerup kingornatigut qinigaanerup misilinneqarnissaanut ataatsimiititaliaagallartumik Inatsisartut pilersitsisassapput. Ataatsimiititaliap ilaasortarissavai ilaasortaq Inatsisartunut sivilunerpaamik ilaasortaasimasoq, taassumalu toqqagai ilaasortat allat sisamat. Aalajangersagaq 2013-imi qinersinerup kingorna inissititerlunilu ataatsimiinnissap tungaanut ulluinnarni sulineq eqqarsaatigalugu nalornisitsisimavoq, tassami Inatsisartut suli inissititeratik ataatsimiititalianik pilersitsisinnaangimmata.

Taamaattumik aalajangersakkap imm. 2-mi allanngortinneqarnissaa siunnersuutigineqarpoq, taamaalilluni erseqqissaatigineqassalluni sivilunerpaamik ilaasortaasimasoq tassaassasoq qinersinerup kingornatigut qinigaanerup misilinneqarnissaanut ataatsimiititaliamik Inatsisartut sinnerlugit pilersitsisussaq. Tamatuma peqatigisaanik qinigaanerup misilinneqarnissaanut ataatsimiititaliaagallartup ilaasortassaasa sinneri qanoq toqqarneqarnissaat erseqqissaatigineqassasoq siunnersuutigineqarpoq.

Taamaalilluni ukiuni arlalinngortuni inatsisartoqarnermi suleriaasinngorsimavoq sivilunerpaamik ilaasortaasimasup ataatsimiititaliamut ilaasortassatut partiit nammineq ilaasortaaffiginngisami siuttutut sinniisaannik, nalinginnaasumik partiit siulittaasuunik, ilaasortassatut toqqaasarnera. Suleriaaseq tamanna 2013-imi qinersinerup kingorna attanneqarsinnaasimangilaq, partiit arlaata siulittaasua ataatsimiititaliap sulinissaa eqqarsaatigalugu erseqqilluinnartumik peqataasinnaangitsutut isigineqartariaqarsimammat. Tamatuma orniginartippaa kikkut ataatsimiititaliami ilaasortaataqassanersut aalajangersakkami aalajangersimavallaamik sinaakkusiinnginnissaq.

Tamatuma saniatigut aalajangersakkap atuuttup mattutinngilaa assersuutigalugu sivilunerpaamik ilaasortaasimasup parteeqatiminiinnaq il.il. toqqaasinnaanera. Qujanartumillu tamanna suli naammattoorneqarsimangilaq, tamatumunngali naleqquttumik oqaasertaliornikkut pinaveersimatinnissaa siunnersuutigineqarpoq. Tamatumani aamma oqaasertaliornera sukangavallaassanngilaq, partiit il.il. Inatsisartunut ilaasortaataqartut ikittuinnaasinnaanerat pissutigalugu.

Oqariaaseq ”sivilunerpaamik ilaasortaasimasoq” manna tikillugu inatsimmi suleriaatsimiluunniit atorneqarsimangilaq, inatsisartoqarnikkulli periutsimi aalajangersimasumik atorneqarsimalluni. Oqariaaseq Suleriaatsimi aamma atorneqalissasoq siunnersuutigineqarpoq, taamaaliornikkut § 1, imm. 2 paasiuminarnerulersillugu.

## *2.2 Suleriaatsimut Ataatsimiititaliap suliassaasa erseqqissaatigineqarnerat*

§ 4, imm. 9-mi aalajangersakkamik nutaamik ilanngussisoqassasoq siunnersuutigineqarpoq, tassani Suleriaatsimut Ataatsimiititaliap suliassai erseqqissaatigineqassallutik. Tamanna pingaartumik Siulittaasoqarfiup aammalu Suleriaatsimut Ataatsimiititaliap akornanni suliassaat agguataarneqarnerisa erseqqissaatigineqarnissaa siunertaralugu kissaatigineqarpoq.

Suleriaatsimut Ataatsimiititaliap ataatsimiititaliap taaguutaa naapertorlugu Inatsisartut Suleriaasiat immikkut suliassaqarfigaa. Ataatsimiititaliap suleriaatsimi § 4, imm. 2 aamma 8 malillugit pilersinneqarpoq, ataatsimiititaliali suliassai ullumikkut tamakkiisuunngitsumik nassuiaatitaqarput. Aammattaaq suleriaatsimi § 60 malillugu missingersuutitut siunnersuutitut aammalu ilassutitut aningaasaliissutitut inatsisissatut siunnersuummut atatillugu ataatsimiititaliap suliassanik aalajangersimasunik isumaginnittarpoq.

Akerlianik Suleriaatsimut Ataatsimiititaliap Siulittaasoqarfiup Inatsisartut Suleriaasiannut siunnersuutaanik, tassunga ilanngullugu suleriaatsip allannguutissaanut siunnersuutitik, tak. § 32, aamma suliqaartassasoq allassimangilaq. Taamaattumik Suleriaatsimut Ataatsimiititaliami suliassat ataatsimoortumik tamakkiinerusumillu allaaserineqarnissaat § 4, imm. 9-mi aalajangersagassatut siunnersuutigineqartumi anguniarneqarpoq, tassanilu aamma allassimassalluni ataatsimiititaliat suliassaqarfii pillugit nalornissuteqartoqarneranut tunngavissaqartillugu ataatsimiititaliap aalajangiisassasoq.

Aammattaaq Inatsisartunut ilaasortat atuuffitik inuussutissarsiutitillu pillugit, tak. § 56-imut nutaamut siunnersuut, qanoq annertutigisumik paasissutissiisarnissaanut maleruagassanik aalajangersaanissamik suliassamik nutaamik ataatsimiititaliap tunineqarnissaa allannguutissatut siunnersuutigineqartumi eqqumaffiginiarneqarpoq.

## *2.3 Ataatsimiititaliat qassinik ilaasortaqaqarneri*

Maannamut § 9, imm. 1-imi allassimavoq ataatsimiititaliat nalinginnaasumik tallimanik ilaasortaqaqassat, immikkulli pissutsit tamanna pisariaqartippassuk ataatsimiititaliat arfineq-marlunnik ilaasortaqaqarnissaat Siulittaasoqarfiup inassutigisinnaagaa.

Ataatsimiititaliat arfineq-marlunnik ilaasortaqaqarsinnaanerat 2011-mi suleriaatsimut ilanngunneqarpoq. Taamatulli allanngortitsinikkut siunertaasimangilaq taamaalilluni ataatsimiititaliami ataatsimi arlalinniluunniit ilaasortat ataavartumik amerlissinneqarnissaat. Aalajangersakkap oqaasertai nassuiaatitaalu naapertorlugit akerlianik isumaasimavoq taamaallaat pissutsit immikkoorluinnaq ittut atuukkaanga ataatsimiititaliamut ilaasortat amerlanerusinnaassat. Assersuutigalugu tamanna pisinnaavoq ataatsimiititaliap ukiumi ataatsimi marlunniluunniit ingerlasussamik qulaajaanissamik annertuumik ingerlatsisussannagortinneqarpat. Taamatuttaaq

ataatsimiititaliap suliassaqarfii annertuumik annertusineqartillugit ataatsimiititaliap ilaasortaasa amerlisinneqarsinnaanerat eqqarsaataasimavoq, piffissamili killilimmi pisussatut.

Taamaattorli qaqugukkut ”pissutsit immikkut ittuunerata”, tassa nalinginnaasuusumut sanilliullugu, qanoq paasineqarnissaa nikikkiartorsimagunarpaq. Taamaalilluni Aalisarnermut Ataatsimiititaliamut ilaasortat qinigaaffimmi kingullermi tallimaniit arfineq-marlunnut amerlineqarsimapput. Peqatigitillugu Aatsitassanut Ataatsimiititaliamut siusinnerusukkut tallimaniit arfineq-marlunnut amerlineqarsimapput, peqatigitillugulu ataatsimiititaliaq Inuussutissarsiornermut Ataatsimiititaliamit suli tallimanik ilaasortalimmit avissaartinneqarluni.

Ataatsimiititaliani ilaasortat amerlanerunissaannik pisariaqartitsineq minnerunngitsumik kil-leqarpoq Inatsisartuni partiit anginerit marluk kisimik ataatsimiititaliami ilaasortaataqartillugit.

Tamatuma saniartigut nalilerneqarpoq ataatsimiititaliat ilaanni ilaasortat tallimaniit arfineq-marlunnut amerlinerat kinguneqarsimasoq ilaasortat ataatsimiittarnissaasa ataqatigiis-saarniarneqartarnerata imaannaannginnerulersimanera, minnerunngitsumik Inatsisartut ataatsimiinnerisa nalaanni, ilaasortat ilaannut nuannaarutaanngitsumik unnukkut sapaatit akunnerisalu naaneranni ataatsimiinnernik amerlanerusunik malitseqarsimanera pissutigalugu. Taamatuttaaq paasinarsisimavoq ataatsimiititaliat arfineq-marlunnik ilaasortallit nalinginnaasumik ataatsimiititaliap tamarmiusup ataatsimoorluni angalasinnaaneritut ataatsimiititaliat periarfissaannik annikillisisimasoq, tamannalu ilaasortarpassuarnit amigaatigineqarluni.

Pissutsit tamakku ilaasortanut kalluarneqartunut uuminaannaratik aammali ilaasortat suliassaat naapertuutinngitsumik qaffariaateqarnerannut oqariartuutaavoq, tassami ataatsimiititaliami inissat amerlanerusut isumagineqassammata, tassungalu ataasumik suliassanik amerlanernik nassaqarluni. Inatsisartut ataatsimiinnerisa nalaani suliassaqarpallaartarneq siusinnerusukkulli inatsisartunut ilaasortanit assigiinngitsunit annertuumik ajornartorsiutaasutut oqaatigineqartareerpoq aammalu suliassat annertuallaarpata ilaasortat ataasiakkaat suliassaminnik assigiinngitsunik isumaginninnerminni peqqissaarussiniarnerat tamatumanit killilerneqartarpoq.

Tamatuma saniatigut suliatigut suleqatigiittullu ilaasortat akornanni ataqatigiinneq, ataatsimiititaliani tallimanik ilaasortalinni ilisimaneqartoq, ataatsimiititaliani arfineq-marlunnik ilaasortalinni sannginnerusoq.

Taamaattumik kaammattuutigineqarpoq § 9, imm. 1-imi aalajangersagaq iluarsineqassasoq taamaalilluni ataatsimiititaliat tallimanik inuttaqartut Inatsisartunit uterfigineqarlutik ilaasortat

amerlassusiata pisariaqartitat malillugit ilaneqarsinaaneranut periarfissaqartitsinani. Ataatsimiititaliat taamatut amerlatigisunik inuttaqarnerat Inatsisartunut ilaasortat amerlassusiat suleriaasiallu eqqarsaatigalugit pitsaanerpaasoq taamaalilluni paasineqarpoq.

#### *2.4 Inatsisartut ataatsimiititaliaanni inuttut namminerisamik sinniisoqartarnej*

§ 10, imm. 2, oqaaseqatigiit aappaannik ilaneqassasoq siunnersuutigineqarpoq, taamaalilluni ataatsimiinnissat sioqqullugit ilaasortaq taassumalu sinniisussaa peqataasinnaangitsillugit ataatsimiititaliani inuttut namminerisamik sinniisoqartitsinissaq pillugu aalajangiinissamut Inatsisartut allaffeqarfiat siunissami piginnaatinneqarsinnaalerlugu. § 10, imm. 2-mi maannamut maleruagassamut sanilliullugu periutsimut atorneqartumut tamanna naapertuunneruvoq.

Maannamut oqaasertaliornej malillugu ataatsimiititaliamut ilaasortaq taassumalu sinniisussaa ataatsimiititaliap ataatsimiinnissaanut peqataasinnaangikkaangata, partii suleqatigiilluunniit Siulittaasoqarfimmut qinnuteqartartussaapput sinniisuugallartumik peqataatitaqarusukkunik.

Ulluinnarni sulinermi aalajangersagaq pineqartoq malinneqarnej ajorpoq piffissamut siviuserusumut sinniisuugallartussamik inissiinissaq pineqartinnagu, tamannalu aamma qaqutiguinnaq pisarluni. Taamaalilluni tamatumunnga taarsiullugu pisuni nalinginnaanerusi suleriaasiusoq unaavoq partiit allaffeqarfii qinnuigineqartarlutik ataatsimiititaliamut ilaasortaq taassumalu sinniisussaasa peqataasinnaatinngit sinniisuugallartussamik nassaarniaqqullugit. Kingusinnerusukkut Siulittaasoqarfiup taamatut ilisimatinneqartarnera takornartaangilaq.

Suleriaaseq pisortatiguunngikkaluartoq ingerlalluartutut isumaqarfigineqarpoq, ataatsimiititaliallu ataatsimiinnerini ataasiakkaani inuttut sinniiseqarnissamik Siulittaasoqarfimmut akuerineqaaqaarnissamik qinnuteqaaqaartarnissaq pisariaqaangitsutut isumaqarfigineqarluni. Taamaattumik ulluinnarni sulinermi periutsimut naapertuuttumik sinniisuugallartussamik kissaateqarnernik Inatsisartut allattoqarfiat akuersissuteqarsinnaangornera ilanngunneqassaaq.

#### *2.5 Ataatsimiititalianit apeqqutit allakkatigut akissuteqarfigineqartarnerat*

§ 14-imut imm. 3-mik nutaamik ilanngussisoqarnissaa siunnersuutigineqarpoq, tassani erseqqissaatigineqarluni ataatsimiititaliaq apeqqutip allakkatigut akineqarnissaanik qinnuteqarpat, ataatsimiititaliap qinnuteqaataa Naalackersuisunit naammassineqassasoq. Naalackersuisut taamaallaat paasissutissanik ataatsimiititaliap pissarsinnaanera killilersinnaavaat, ataatsimiititaliap taakkuninnga paasisaqarnissaminik soqutiginninnera pisortat namminersortulluunniit soqutigisaannut sakkortuneroqisunut tunullinneqartariaqarpat. Taamatut killiliineq tamatigut allakkatigut tunngavilersorneqarsimassaaq.

Aalajangersakkat taakku aalajangersarlugulu erseqqissarpaat Inatsisartunit maannamut suna tunngavissaatinneqarnerseq, taamaalilluni nipangiussisimasussaataaneq assigisaalluunniit pissutigalugit ataatsimiititaliap apeqqutaanut akissuteqarnissaminut Naalakkersuisut akimmisaaruteqarsinnaanersut siunissami nalornissutigineqaqqunagu.

Tamanna pillugu inatsisitigut inissisimaneq tamanna Nunat Allanut Sillimaniarnermullu Ataatsimiititaliap Naalakkersuisut siulittaasuannut 15. maj 2014-imi allagaani kingullermik nassuiaatigineqarpoq aammalu siunissami nalornisoqartarnissaa pinngitsoortinniarlugu inatsisitigut inissisimanagerup tamatuma Suleriaatsimi erseqqissarneqarnera Siulittaasoqarfiup naapertuuttutut isigaa.

Imm. 3-mi aalajangersagassatut siunnersuutigineqartoq suleriaatsimi § 14, imm. 2-mi aalajangersakkamut atuuttumut taamaalilluni tapertaliussaassaaq, tassani aalajangersarneqarluni ataatsimiititaliaq, ilaatigut Naalakkersuisunut apeqquteqartarnermigut, suliassaqarfimmi iluani ingerlatsinermik malittarinninnissaminut pisussaasoq aammalu Naalakkersuisut inatsisitigut killissarititat iluanni ingerlatsinikkulluunniit ileqqorissaarnermut tunngatillugu killigititat iluanni ingerlatsinissaat nakkutigissallugu.

Imm. 2-mi aalajangersakkami naatsorsuutigineqarpoq Inatsisartut ataatsimiititaliaannit apeqqutinut akissuteqarnissaminut Naalakkersuisut, tamanna Naalakkersuisunut ajornanngippat, pisussaaffeqartut. Pisussaaffik tamanna inatsisartoqarnermik periaatsimit aamma inerniliunneqarsinnaavoq, tassami Inatsisartut inatsisiliornermik saniatigut naalakkersuisunik nakkutilliinissaq suliassarimmassuk. Inatsisartutigoortumik naalakkersuisunik nakkutilliinermut atatillugu piumasaqaataavoq, nakkutilliineq sunniuteqarluassappat, Inatsisartut naalakkersuisut naalakkersuinikkut ingerlatsinerat allattoqarfiillu tamatuminnga timitaaliiniarnerat pillugit paasissutissanik pisariaqartunik tamanik pilersorneqarlutilluunniit arlaatigut pissarsisinnaanissaat.

Isuma tamanna Inatsisartut Ombudsmandiannit oqaaseqaammi oqaatigineqartunut ukununnga tunngaviusoq naatsorsuutigineqartariaqarpoq (tak. Ombudsmandip 2008-mi ukiumoortumik nalunaarutaa, kapitali 5.9.1):

*”Qitiusumik allaffeqarfissuup tamat oqartussaqaataaneranni inatsisartoqarnikkut inissisimanagerata manna nassataraa, tassalu Inatsisartut aqutsisoqarfik piumaffigisinnaagaat paasissutissanik aqutsisoqarfiup naalakkersuinikkut inatsiseqartitsinikkullu nakkutigineqarnerani atugassanik tunniusseqqullugu.*

*Taamaalilluni uanga paasinninnera unaavoq isertuussinissaq nipangiussisimanissarlu pillugit isumaqatigiissutit Inatsisartunut Inatsisartulluunniit ataatsimiititaliaannut atortuutinniarneqarsinnaanngitsut.”*

Kiisalu aamma oqaatigineqarsinnaavoq ukiorpassuarni inatsisartoqarnermi periaasiusimammatt ataatsimiititaliap Naalakkersuisunut apeqqutaasa akineqartarneri, tamanna Naalakkersuisunut ajornanngikkaangat.

Suliassa qarfinni ataasiakkaani tunngavissaq tamanna inatsisitigut aalajangersagaareerput sukumiinerusumillu erseqqissaatigineqareerluni. Taamaalilluni Nunanut Allanut Sillimaniarnermullu Ataatsimiititaliamut atatillugu Inatsisartut Naalakkersuisullu pillugit Inatsisartut inatsisaanni § 21, imm. 1-imi ima aalajangersaasoqarpoq:

*”Inatsisartut Nunanut Allanut Sillimaniarnermullu Ataatsimiititaliaata nunanut allanut sillimaniarnermullu pissutsit Naalakkersuisuneersut suliassarai taakkunungalu attuumassuteqartunut sammisamut apeqquteqarsinnaallunilu oqaaseqaateqarsinnaavoq. Ataatsimiititaliap suliassa qarfimmini ineriartornermut malinnaalluarnissani pisussaaffigaa.”*

Aalajangersakkamut inatsimmut nassuiaatini ilaatigut makku paasissutissiissutigineqarput:

*”Aalajangersakkap imm. 1-ani Nunanut Allanut Sillimaniarnermullu Ataatsimiititaliap suliassai oqaatigineqarput, tassunga ilanngullugit Naalakkersuisunik suleqateqarnek. [...]*

*Imm. 1-imi, oqaaseqatigiit siullermi paasissutissat Naalakkersuisunit tiguneqartut ataatsimiititaliamit suliarineqartarnerat pineqarput, ilisimatitsissut ingerlaavartumik, akuttoqatigiissumik imaluunniit pissuteqartumik tunniunneqaraluarpalluunniit kiisalu ilisimatitsissut oqaatsitigut allakkatigulluunniit tunniunneqaraluarpalluunniit.*

*Nunanut allanut politikeqarnermi Naalakkersuisut akisussaassuseqarnerat namminersorneq pillugu inatsimmi kapitali 4-mi oqaaseqaatinik ilaqartinneqartumi massakkut allassimavoq, Naalakkersuisullu nunanut allanut politikeqarnermikkut ingerlatsinertik naalakkersuinikkut tamatigoortumik tunngaveqarlutik Inatsisartunullu tamatigoortumik akisussaassuseqarlutik ingerlappaat. Akisussaannermut tassunga peqatigitillugu Naalakkersuisut Inatsisartunut nassuiaatinik ilisimatitsissutinillu tunniussa qartarput, soorlu Nunanut Allanut Sillimaniarnermullu Ataatsimiititaliamut, pingaarnermik makkuninnga ima qartunik:*

*1) Inatsisit inuiannut tamanut tunngasut pillugit isumaqatigiissutini Kalaallit Nunaannut atuuttussani isumaqatigiinniarnernut Naalakkersuisut peqataaffigisaanni.*

*2) Suliat aalajangiinerillu nunanut allanut sillimaniarnermullu tunngassuteqarlutik pingaaruteqartut allat, assersuutigalugu nunanik allanik politikikkut isumaqatigiissutit.*

*3) Pisut nunanut allanut sillimaniarnermullu tunngasut allat Kalaallit Nunaannut pingaaruteqartut.*

4) Nunanut allanut sillimaniarnermullu pissutsit Kalaallit Nunaannut tunngassuteqartut danskit naalakkersuisuisa Folketingets Udenrigspolitiske Nævn-imut nalunaarutigisassai. Nr. 1-imi inatsisit inuiannut tamanut tunngasut pillugit isumaqatigiinniarnit erseqqissarneqartut isumaqatiginninniarnit namminersorneq pillugu inatsimmi kapitali 4-mi killiliussat iluanniittut pineqarput, tassa imaappoq ilaatigut isumaqatiginninniarnit Naalakkersuisut isumaqatiginninniarnissamut piginnaatitaaffii ilaatigullu isumaqatiginninniarnit danskit naalakkersuisuisa piginnaatitaaffii aammalu Naalakkersuisut peqataaffigisai. Naalakkersuisut isumaqatiginninniarnit ingerlannissaat sioqqullugit Nunanut Allanut Sillimaniarnermullu Ataatsimiititaliaq ilisimatittassavaa. Isumaqatiginninniarnit erseqqissumik paasineqarsinnaassapput aammalu Nunanut Allanut Sillimaniarnermullu Ataatsimiititaliaq Naalakkersuisut aalajangigaannut ilisimasaqarnissaa, aamma isumaqatiginninniarnissat pisussat sioqqullugit aalajangiinerit Kalaallit Nunaanni Namminersorlutik Oqartussat isumaqatiginninniarnit inissisimanerisa aalajangernissaannut iluaqutaasinnaappata.

Imm. 1-imi oqaaseqatigiit aappaasa imm. 1-imi oqaaseqatigiit siulliit taperserpaat. Aalajangersakkap inatsiseqarnikkut pingaaruteqarnera siullertut ersersitsisuuvoq imm. 1-imi oqaaseqatigiit siulliit ataatsimiititaliaq sulinissaanut iliuuseqarnissamulluunniit periarfissaanut tamakkiisumik takutitsisutut paasineqassanngimmata..

[...]

Ilaatigut danskit naalakkersuisuinut isumaqatigiissutaavoq danskit naalakkersuisuisa Folketingets Udenrigspolitiske Nævn-imut ilisimatitsissutai Kalaallit Nunaannut pingaaruteqartut Naalakkersuisunut ingerlatinneqartassasut, taamaaliornikkut sapinngisamik peqatigisaanik Nunanut Allanut Sillimaniarnermullu Ataatsimiititaliaq ilisimatinneqassamat.”

Inatsisartut Naalakkersuisullu pillugit Inatsisartut inatsisaannut nassuiaatini takuneqarsinnaavoq Naalakkersuisut – namminneq suliniuteqarnermikkut – pisussaaffeqartut minnerunngitsumik makku pillugit Inatsisartunut, taamatullu aamma Nunanut Allanut Sillimaniarnermullu Ataatsimiititaliamut, nassuiaateqarlutillu ilisimatitsissuteqartarnissamut:

- 1) Nunat tamalaat akornanni inatsisitigut pituttuisunik Kalaallit Nunaannut atuuttussanik isumaqatigiissuteqarnissaq siunertaralugu isumaqatigiinniarnissat aggersut.
- 2) Nunanut allanut sillimaniarnermullu pissutsit Kalaallit Nunaannut tunngassuteqartut danskit naalakkersuisuisa Folketingip Nunanut allanut tunngasutigut Naalakkersuinikkut ingerlatsineq pillugu aalajangiisastutut ataatsimiititaliaannut (Folketingets Udenrigspolitiske Nævnimut) nalunaarutigisai.



3) Nunanut allanut sillimaniarnermullu tunngasutigut naalakkersuinikkut ingerlatsinermi i-ngerlatat aalajangiinerilluunniit pingaarutillit allat, assersuutigalugu nunanik allanik naalakkersuinikkut nalunaaruteqarnissamik isumaqatigiissuteqarnerit.

4) Pisut nunanut allanut sillimaniarnermullu tunngasut allat Kalaallit Nunaanut pingaaruteqartut.

Imm. 1, oqaaseqatigiinnut siullernut nassuiaatit imatut atuarneqarsinnaapput imm. 1, oqaaseqatigiinni siullerni taamaallaat pineqartoq Nunanut Allanut Sillimaniarnermullu Ataatsimiititaliap paasissutissat ataatsimiititaliamit Naalakkersuisunit tiguneqartut pillugit apeqquteqarsinnaanera. Aalajangersakkap oqaasertai (*"Inatsisartut Nunanut Allanut Sillimaniarnermullu Ataatsimiititaliaata nunanut allanut sillimaniarnermullu pissutsit Naalakkersuisuneersut suliassarai taakkununngalu attuumassuteqartunut sammisamut apeqquteqarsin-naallunilu oqaaseqaateqarsinnaavoq"*) taamaattoq taama paasinninnissamut tunngavissiinngillat.

Taamaattumik imaassorinarneruvoq inatsimmut nassuiaatit ersersiinnaraat Naalakkersuisut ataatsimiititaliamut paasissutissiissutaat tassaasut Naalakkersuisut nunanut allanut sillimaniarnermullu tunngasutigut naalakkersuinikkut ingerlataat pillugit ataatsimiititaliap ilisimasaanut pingaarnertut – amerlanertigullu kisiartaallutik – najoqqutassat. Qanoq ilillunimi ataatsimiititaliaq ingerlatanut ataatsimiititaliap ilisimasaqarfiginngisaanut apeqquteqartassagaluarami? Aallaavilli tamanna takuneqarsinnaavoq ilaannakortumiinneq attanneqarsinnaasoq, Naalakkersuisummi amerlasuutigut nunanut allanut sillimaniarnermullu tunngatillugu naalakkersuinikkut ingerlatat pillugit tusagassiorfinnut nalunaaruteqartarmata, taamallu aamma Naalakkersuisut nittartagaanni pisussanut takussutissat aamma ingerlatat tamakku pillugit paasissutissanik imaqarsinnaasut.

Naak naatsorsuutigaluaranniluunniit imm. 1, oqaaseqatigiit aappaanni taamaallaat pineqartut paasissutissanut ataatsimiititaliamit Naalakkersuisunit pissarsiarineqarsimasunut ataatsimiititaliap apeqqutai, taamaattoq imm. 1, oqaaseqatigiit aappaat (*"Ataatsimiititaliap suliassaqarfimmini ineriartornermut malinnaalluarnissani pisussaaffigaa."*) ataatsimiititaliamut periarfissiivoq Naalakkersuisunut apeqquteqarnissamut ataatsimiititaliap Naalakkersuisunit pissarsiarisimasaasa saniatigut paasissutissat allat tunngavigalugit. Inatsimmut nassuiaatini aalajangersagaq taanna pillugu ilisimatitsissutigineqarpoq, *"aalajangersakkap inatsiseqarnikkut pingaaruteqarnera siullertut ersersitsisuuvoq imm. 1-imi oqaaseqatigiit siulliit ataatsimiititaliap sulinissaanut iliuuseqarnissamulluunniit periarfissaanut tamakkiisumik takutitsisutut paasineqassanngimmata."*

Taamaattumik apeqqutaatinnagu ataatsimiinnerit imarisai ataatsimiititaliap apeqquteqarfigisai erseqqinnerusumik ”nunanut allanut sillimaniarnermullu tunngasutigut naalakkersuinikkut ingerlatsinermi ingerlatat pingaarutilittut” imaluunniit ”pisut nunanut allanut sillimaniarnermullu tunngasut allat Kalaallit Nunaannut pingaaruteqartutut” taaneqarsinnaanersut, Nunanut Allanut Sillimaniarnermullu Ataatsimiititaliaq taamaalluni Inatsisartut Naalakkersuisullu pillugit Inatsisartut inatsisaanni § 21, imm. 1 malillugu periarfissaqarpoq pissutsit ataatsimiititaliap suliasaqarfiata iluaniittut tamaasa pillugit apeqquteqarsinnaanissamut.

Nunanut Allanut Sillimaniarnermullu Ataatsimiititaliamut allakkatigut akissuteqarnissamut Naalakkersuisut pisussaaffeqarnerat eqqarsaatigalugu Inatsisartut Naalakkersuisullu pillugit Inatsisartut inatsissaannut nassuiaatini tunngavissaatinneqarpoq Naalakkersuisunit Nunanut Allanut Sillimaniarnermullu Ataatsimiititaliamut ilisimatitsissutit oqaatsitigut allakkatigulluunniit tunniunneqarsinnaasut:

*” Imm. 1-imi, oqaaseqatigiit siullermi paasissutissat Naalakkersuisunit tiguneqartut ataatsimiititaliamit suliarineqartarnerat pineqarput, ilisimatitsissut ingerlaavartumik, akuttoqatigiissumik imaluunniit pissuteqartumik tunniunneqaraluarpulluunniit kiisalu ilisimatitsissut oqaatsitigut allakkatigulluunniit tunniunneqaraluarpulluunniit.”*

Aammattaaq nalinginnaasumik nassuiaatini immikkoortoq 2-mi makku paasissutissiissutigineqarput:

*” Nunanut Allanut Sillimaniarnermullu Ataatsimiititaliap imatut ilusilinnik ilisimatinneqartarnera ileqquusimavoq:*

*- Oqaluuserisassat, tassaagajunnerusut isumaqatigiinniarnert Kalaallit Nunaata peqataaffigisai pillugit Naalakkersuisut isummernissaannut tunngavissiat ilisimatitsissutilluunniit assilinerisigut allakkatigut paasissutissiinerit/ilisimatitsinerit*

*- Isumasioqatigiinnerit, tassanilu Naalakkersuisoq oqaasiinnartigut ilisimatitsissuteqartarluni, ass. isumaqatigiinniarnert ingerlasut pillugit suliani tuaviortuni imaluunniit ataatsimiititaliap apeqquteqarfigisimasaani.*

*- Taakkua pissuseqataannik massakut periaasiuvoq Danmarkimi nunanut allanut ministerip Udenrigspolitisk Nævnimut suliat Kalaallit Nunaannut tunngassuteqartut ataatsimiititaliamut nassiunneqartalermata.”*

Taamaakkaluartoq inatsisiliornerni Inatsisartut Naalakkersuisullu akornanni pissutsinik aqutsisuni aalajangersagaqanngilaq tamatuminna ataatsimiititaliaq kissaateqarpat ataatsimiititaliamit apeqqutit allakkatigut akineqartarnissaannik Naalakkersuisunik peqqusisunik. Taamatut aalajangersaanissaq pisariaqanngitsutut nalilerneqarsimasoq, tassami Naalakkersuisut, ataatsimiititaliap ilisimasai tunngavigalugit ataatsimiititaliamit allakkatigut

apeqqutit allakkatigut manna tikillugu akissuteqarfigiuartarsimammatigut, apeqqutit apersuinermi ilisimateqatigiiffiusumilluunniit ataatsimiinnermi akineqarnissaat ataatsimiititaliap kissaatigisimanngippagu.

Akerlianik 2014-im upernaakkut Naalakkersuisut Siulittaasuata aammalu Nunanut Allamut Sillimaniarnermullu Ataatsimiititaliap akornanni attaveqatigiinnerit nutaajunerusut takutippaat Naalakkersuisut akissuteqarnissamut pisussaaffiata sukumiinerusumik annertussusissaa ersarissunik maleruagassaqaannginnera pissutigalugu nalornissuteqartoqarsinnaasoq. Tamanna tunngavigalugu Siulittaasoqarfik isumaqarpoq illuatungeriit tamarmik soqutigissagaat Naalakkersuisut allakkatigut apeqqutinik allakkatigut akissuteqartarnissamut pisussaaffiat pillugu inatsisitigut inissisimaffimmut erseqqissaataasunik oqaasertanik suleriaatsimi ilanngussisoqarnissaa, taamaalillunilu tamanna pillugu nalornissuteqartoqaqqinnissaa pinngitsoortillugu.

#### *2.6 Ataatsimiititaliat isumaliutissiissusiornissamut pisussaaffiat atorunnaarsinneqassaaq*

Inatsisartut Siulittaasoqarfiata arlaleriarluni qinigaaffinni aamma siuliini paasisarpaa ataatsimiinnernut oqaluserisassatut siunnersuutit amerlassusii – minnerunngitsumillu ilaasortanit aalajangiiffigisassatut siunnersuutit amerlassusii – nalinginnaasumik annertusiartortutut isikkoqartut. Peqatigitillugu erseqqippoq partiit allaffeqarfiisa aningaasaqarnikkut nukittorsarneqarnerat naalakkersuinermillu suliaqarnerup ilungersuunneqarnerulernerata malitsigisimagaa nalinginnaasumik aalajangiiffigisassatut siunnersuutit imaannaannginnerulersimanerat.


Siunnersuutit taamatut amerlisimanerat aamma pissuteqarsinnaavoq inatsisartut ukiuata suliffiusup ukiumut ilivitsumut sivitsorneqarneranik, ataatsimiinnerit nalaanni piffissaq kisimi suliffiujunnaarluni. Taamatulli aamma Inatsisartuni oqaaseqarluni akisassanik allakkatigut apeqquteqarsinnaanerup atorunnaarsinneqarsimanera sunniuteqarsimasinnaavoq.

Siunnersuutit amerliartortut suliarineqarnissaat Inatsisartuniinnaanngitsoq, kisiannili aamma Naalakkersuisuni pisortallu ingerlatsinerata sinnerani, annertunerusumik allaffissornikkut nukissanik pisariaqartitsillunilu malitseqarsimasoq.

Nukissanik annertuumik atuineq tamanna nunatta karsianut akisuinnarani aamma malitse-qarpoq suliassanik pingaarutilinnik allanik suliaqarsinnaanissamut periarfissat aamma taamatut annikillisinneqartarmata. Tamanna Inatsisartut allattoqarfiannuinaaq atuunnani aamma Naalakkersuisut allaffeqarfiinut atuuppoq, kingulliullugit taaneqartut aqutsinermut, pilersaarusiornermut nalinginnaasumillu innuttaasunik sullissinermut atatillugu ingerlaavartumik ingerlatsinermi suliassanik aamma isumaginnittussaammata.

Tamatuma saniatigut Inatsisartunut ilaasortat ataatsimiinnerit nalaanni suliassatigut annertuumik artukkerneqareernerat taamatut ineriartortoqarnerata aamma annertusassavaa.

Ilaasortanit aalajangiiffigisassatut siunnersuut amerlassusiinut ataani takussutissiaq ukiunilu kingullerni ineriartortitsinermik takutitsivoq:



Ataatsimiittarnerat nalinginnaasumik sivitsorneqarnerata tamanna allanngortinnavianngilaa, nukissanik atuineq taannaannaassammat, allatulli agguataarlugu. Tamatuma saniatigut mattunneqarsinnaanngilaq ataatsimiittarnerit sivitsorneqarnissaannik aalajangerneq immi ilaasortat namminneq saqqummilaarnissartik pinerullugu amerlanerusunik siunnersuuteqarnissannik aqqtissiuussisinnaammat, taamaattoqassappallu nukissat suli annertunerusut atorineqartariaqarnerannut pissutaassallutik.

Kiisalu aalajangiiffigisassatut siunnersuutit amerliartuinnartut aalajangikkat pitsaassusaannik ernummateqarnermik kinguneqarput, tassani eqqarsaatigineqarluni aalajangigassat pitsaassusiannik qulakkeerineq nukissat killillit ataatsimullu isigalugu allannguuteqanngitsut atorlugit isumagineqassammat.

Taamatut ineriartortoqarnera Siulittaasoqarfimmit assut ernummatigineqarpoq aammalu siunnersuutit Inatsisartunut oqaluuserisassanngortinneqartut amerlassusiat ukiualuit matuma siornatigutut naammassineqarsinnaanerusutut annertussuseqartinnissaanut periarfissat oqaluuserisimallugit.

Ilaasortat siunnersuutinik qassinik saqqummiussisinnaanerannut killilersuinissaq Siulittaasoqarfimmit naleqqututut isigineqanngimmat tamatumunnga taarsiullugu siunnersuutigineqarpoq siunnersuutinut inatsisartut ataatsimiinnerisa nalaanni saqqummiunneqartunut tamanut isumalitissiissusiornissamut Inatsisartut ataatsimiititaliaasa pisussaaffeqarnerat atorunnaarsinneqassasoq. Taamatut allannguuteqarnermi suleriaaseq ukioq 1999-ip tungaanut Inatsisartunit atorineqartoq atuutseqqinneqalissaaq.

Siunnersuutit ataatsimiititaliamut suliarineqartussatut innersuunneqartut pillugit isumaliutissiissuteqarnissamut ataatsimiititaliamut pisussaaffiliisumik Inatsisartut suleriaasiat 1999 tikillugu imaqartinneqanngilaq. Aalajangersagaq taamaattoq 1999-imi suleriaatsimi § 17, imm. 1-imi ilanngunneqarmat tamatumani siunnersuutit tamarmik sapinngisamik sukumiisumik suliarineqarnissaasa qulakkeerneqarnissaa qularnanngitsumik siunertarineqarsimavoq. Taamaattorli siunnersuutit Inatsisartunit siullermeerneqarneranni oqallinneq malillugu siunnersuutip naalakkersuinikkut amerlanerussuteqarfigineqarnissaa anguneqarsinnaanngitsut tunulliunneqarnissaannut periarfissaq ataatsimiititaliat tamatuma peqatigisaanik annavaat.

Siunnersuutinik naalakkersuinikkut siunissaqanngitsunik tunulliussisarnerup siusinnerusukkut kingunerisarpaa siunnersuutit ”ataatsimiititaliani ipisinneqarsinnaasarmata”. Oqariaaseq tamanna isumaqarpoq isumaliutissiissummik siunnersuutip Inatsisartuni suliarineqaqqinnissaanut pisariaqartinneqartumik saqqummiussinnginnissaq Inatsisartut ataatsimiititaliaata toqqaraa, taamaalilluni siunnersuut annertunerusumik oqaluusereqqinneranilu naggataatigut atorunnaartarluni.

Nalilerneqartpoq ataatsimiititaliat pingaarnersiutinissamut periarfissaasa nassuiaatigineqartut atuutseqqileraluarpata tamanna Inatsisartuni Naalakkersuisunilu kiisalu taakku allaffeqarfiini il.il. suliassanik artukkerneqarnerup annikillisarneqarnissaanut naammaginartumik sakkussaassaaq. Aaqqiissutissap tamatuma ajoqutitai annertunngillat, siunnersuutitut politikikkut siunissaqanngitsunut nukissanik atuineq siunnersuut inersuarmi naggataamik oqaluuserinninnermi itigartinneqarpat maanaannartussaannerat eqqarsaatigalugu.

Taamaattumik ataatsimiititaliat isumaliutissiissuteqarnissamut pisussaaffiat suleriaatsimi § 17, imm. 1-imi oqaaseqatigiit aappaanni 1999-imi atuuttoq atorunnaarsinneqassasoq siunnersuutigineqarpoq.

Siunnersuut suleriaatsimi § 38, imm. 5-ip allannguutissaatut siunnersuutigineqartumut aammalu siunnersuutit Inatsisartut ukiuata naanerani inaarutaasumik akuersissutigineqanngitsut atorunnaartarnissaannik qulakkeerisumut atasutut isigineqassaaq. Taamaaliornikkut siunnersuutit politikikkut siunissaqanngitsut ataatsimiititalianilu ipisinneqartut kingusinnerusukkut nutaamik isummerfigineqarnissaasa pisariaqannginnissaa qulakkeerneqassaaq.

### *2.7 Siunersuineq aammalu ilisimatitsiffiusumik ataatsimiinnerit*

Suleraatsimi § 19 allanngortinneqassasoq siunnersuutigineqarpoq, taamaalilluni ”siunersuinerup” aammalu ”ilisimatitsiffiusumik ataatsimiinnerit” siunissami

immikkoortinneqarsinnaaqullugit, tamannalu aalajangersakkap Inatsisartut periusianni ullumikkut atugaareerneranut naapertuutissaaq.

Suleriaatsimi § 19 atuuttoq malillugu ataatsimiititaliaq Naalakkersuisunut ilaasortamik siunersiuinissamut qaqugukkulluunniit aggersaasinnaavoq. Oqariaaseq ”siunersiuineq” oqaasertani malillugu isumaqatigiinniarnissamik imaluunniit siunnersuinissamik oqariartuuteqarpoq, inatsisartoqarnikkulli periutsimi siunersiuinissamut aggeqqusissut pisutut ilungersunangaatsiartutut paasineqartarpoq, tassami sakkussaq tamanna pisuni Naalakkersuisunut ilaasortap iliuuserisimasani pillugit ataatsimiititaliamut nassuiaasinneqarnissaanut atorineqarajuttarmat.

Ataatsimiititaliaq Naalakkersuisullu aamma allatigut pisortatiguunnginnerusunillu naapissinnaasarpas, ilaatigut suliniutissatut aggersut pilersaarutilluunniit pillugit ataatsimiititaliap ilisimatinneqarnissaa siunertaralugu. Ataatsimiinnerit taamaattut danskisut nalinginnaasumik ”orienteringsmøder”-imik taaneqartarput. Taamaalilluni ilisimatitsiffiusumik ataatsimiinneq ”samråd”-itut (siunersiuinertut) ilungersunartiginnilaq.

Taamaattorli isumasioqateqarneq ilisimatitsiffiusumillu ataatsimiinneq kalaallisut ataatsimoortillugit atorineqakkajupput. Tamannalu pissarsiviusumik allangortinneqarsinnaavoq, taamaalilluni § 19-imi siunissami siunersiuinissamut/samråd aammalu ilisimatitsiffiusumik ataatsimiinnissamut/orienteringsmøde periarfissat tamarmik taaneqarlutik.

Qulaani taaguutit nutaat ulluinnarni sulinermi ajornartorsiutitaqanngitsumik atugaalereerput. Suleriaaseq tassuunakkut nutarterneqassasoq Siulittaasoqarfimmit kissaatigineqarpoq, taamaalilluni Naalakkersuisunut ilaasortanik aggersaassutini oqaatsit atorineqartut suleriaatsimi oqaatsinut atorineqartunut naapertuuttunngortillugit, tamatumalu peqatigisaanik ataatsimiinnissap suna siunertarineraa oqariartuutigalugu.

### *2.8 Apeqquteqaat aallaavigalugu oqallinnerit oqaaseqaatissatut siunnersuummik ilaqartinneqassapput*

Ukiut marlussuit matuma siorna Inatsisartut ataatsimiittarfianni akineqartussanik oqaaseqarluni apeqquteqarsinnaaneq atorunnaarsinneqarmat § 33 naapertorlugu aalajangiiffigisassatut siunnersuutinik aamma § 36 naapertorlugu apeqquteqaat aallaavigalugu oqallinnissamik siunnersuutinik oqaluuserisassatut nalunaaruteqarsinnaanermut ilaasortat soqutiginninnerat annertuseriaateqartoq Siulittaasoqarfimmit paasineqarpoq. Ilaasortat siunnersuutaasa amerlassusiisa ineriartornerannut itisiliissutissatut nalinginnaasumik nassuiaatini immikkoortoq 2.6 innersuussutigineqarpoq.

Ineriartorneq tupigisassaangilaq, tassami inatsisartuni eqeersimaartuunerup takutinneratigut innuttaasunut naalakkersuinikkut saqqummilaarnissaq Inatsisartunut ilaasa ilaatigut

anguniartagaattut naatsorsuutigineqartariaqarmat. Partiit allattoqarfii ilaasortamik politikikkut saqqumilaarnissamik suliniuteqarneranni tapersersornissaannut siusinnerusumut sanilliullugu ullumikkut piareersimanerupput.

Nassuerutigineqartariaqarporli apeqquteqaat aallaavigalugu ullumikkut Inatsisartuni oqallisaasartut qularnangitsumik siusinnerusukkut allaffissornikkut periusaasimasoq malillugu allanngortinneqartarsimassagaluardmata apeqqutinngortillugit allakkatigut oqaaseqarluni-luunniit akisassat, taamatullu aamma ilutsumikkut imarisamikkullu piukkunnangimmata naalackersuinnikkut isummersornernik suugaluartunilluunniit siuarsaanissamut, Inatsisartuni innuttaasulluunniit akornanni.

Taamatuttaaq nassuerutigineqartariaqarpoq apeqquteqaat aallaavigalugu oqallinnerit siunnerfeqarnerusarmata nalinginnaasumik erseqqinnerusumilluunniit ajornartorsiutit nassuiaateqarfigineqarnissaannik aaqqiissutaasinnaasunik ujartuiffiunngitsumik. Tamanna pissutaagunarpoq apeqquteqaat aallaavigalugu oqallinnissamik siunnersuutit amerlanerit inatsisunik pissusiviusunillu atuuttunik siumut misissueqqaarnernik tunngaveqarneq ajormata, annerusumilli taamaassorinninnernik tunngaveqartarlutik, tamannalu tunngavigalugu atituallaarsinnaallutik.

Tamanna tunngavigalugu apeqquteqaat aallaavigalugu oqallinnerit atorunnaarsinneqarnissaannut periarfissaq Siulittaasoqarfimmit isumaliutigineqarsimavoq, isumaqarlunili oqallinnerit pitsaassusiannut kivitsissutaasumik taakku imarisaat siunnerfilerneqarsinnaappat taakku suli tunngavissaqartut.

Tassunga atatillugu apeqquteqaat aallaavigalugu oqallinnissanut siunnersuutit ilulissaannut piunasaqaatit allanngortinneqarnissaat Siulittaasoqarfiup siunnersuutigaa, taamaalilluni taakku Inatsisartut oqaaseqaatissaattut siunnersuummik siunissami ilaqartinneqartassammata. Oqaaseqaat aalajangikkatut § 33 malillugu aalajangiiffigisassatut siunnersuutinit ilisimaneqartutut Naalackersuisunut pituttuisutut iluseqassanngilaq. Tamatumunnga taarsiullugu oqaaseqaat isummanik oqariartuutaassaaq, oqallinneq ingerlanneqartoq tunngavigalugu Inatsisartuni amerlanerussuteqartunit akuerineqartussaq.

Tassunga atatillugu oqaatigineqartariaqarpoq suleriaatsimi § 36, imm. 4 ullumikkut periarfisseereermat apeqquteqaat pillugu oqallinnerup nalaani Inatsisartunut ilaasortat partiillu Inatsisartut oqaaseqaatissaattut siunnersuummik saqqummiussinissaannut. Siunnersuut taamaattoq allakkatigut naatsumik tunngavilersuutitalerlugu ataatsimiinnermik aqutsisumut nalunaarutigineqassaaq, oqallinnermullu ingerlanneqartumut pissusissamisoortumik attuumassuteqartuussalluni. Oqaaseqaatissatulli siunnersuummik tassangaannartumik saqqummiussinissamut periarfissaq taanna oqallinnerup imarisaanut siunnerfiliinissaq siunertaralugu atorneqarsimanngilaq.

Apeqquteqaat aallaavigalugu oqallinnerup kingorna oqaaseqaat Naalackersuisunut pituttuissanngippat tamanna apeqquteqaat aallaavigalugu oqallinnerit ataatsimiititaliamut suliassanngortitsinissamut periarfissaqarnani maannamutut inersuarmit taamaallaat ataasiaannarlugit oqaluuserineqarsinnaanerata aallaavigalugu isigineqassaaq. Apeqquteqaat aallaavigalugu oqallinnermi oqaaseqaatissatut siunnersuut nalinginnaasumik ataatsimiititaliat sulineranni pisartutut pitsaassusissaa eqqarsaatigalugu annertoqataanik qularnaarinnittoqaralunilu misissuiffiussanngimmat.

Akerlianik Siulittaasoqarfiup naatsorsuutigaa oqaaseqaatissatut siunnersuuteqarnissamut pisussaaffeqarnerup apeqquteqaat aallaavigalugu oqallinnerit siunertarpiat siuarsassagaa, tassalu pisortat suliassaataannik oqaluuserisassanngortitsineq aammalu Naalackersuisunut ilaasortamit ataatsimit arlalinnilluunniit tamanna pillugu nassuiaateqaqqusineq, tamatumalu kingorna Inatsisartunut ilaasortat akornanni isummanik avitseqatigiinneq. Siunertaq tamanna pingaartumik anguneqarsinnaassaaq ilaasortat oqallisissatut qulequttamik toqqaanermikkut oqaaseqaatissatullu siunnersuuteqarnermikkut sammineqartup inunnut suliffeqarfinnilluunniit aalajangersimasunut saatinnginnissaa nalinginnaasumilli oqariartaatsit malinneqarnissaat qulakkiissammassuk.

Apeqquteqaat aallaavigalugu oqallinnerit Inatsisartut oqaaseqaatissaannut siunnersuutitallit pillugit suleriaatsimi § 36, imm. 1 aamma 4-p allanngortinnerisigut siunnersuut piviusunngortinniarnearpoq.

Aammattaq siunnersuut oqaluuserisassat taamaattut nalunaarutiginnissaannut sivikitsuinnarmik piffissaqartitsinerup atuutsinneqalerneratigut apeqquteqaat aallaavigalugu oqallinnerit uummarissarneqarnissaannik Siulittaasoqarfiup kissaataanut atasutut isigineqassaaq, tak nalinginnaasumik nassuiaatit, imm. 2.10.

### *2.9 Inatsisartut ukiuata naanerani siunnersuutit atorunnaartarnissaat*

Naalackersuisunut Inatsisartunullu ilaasortamit siunnersuutit Inatsisartut ukiuata naanerani inaarutaasumik akuersissutigineqarsimanngitsut atorunnaassasut siunnersuutigineqarpoq. Tamanna aamma atuuppoq Inatsisartunut ilaasortamit apeqquteqaatinut, Inatsisartut ukiuata naanerani inaarutaasumik suliarineqarsimanngitsunut.

Aalajangersakkap assinga Inatsisartut Suleriaasianni 1999-imeersumi ilaatinneqarsimavoq (taamani § 37, imm. 5), 2001-imilu (UKA 2001/60) atorunnaarsinneqaqqilluni. Atorunnaarsitsinermut tunngavigineqarsimagunarpoq ukiakkut ataatsimiinnerit kingorna aasaanerani qaammatit siunnersuutit innersuunneqartut ataatsimiititaliani suliarineqartarnerata atornerqarnerunissaannik kissaat, taakku ukiakkut ataatsimiinnerni aappaasaaneerneaarlutillu pingajussaaneerneaqtarnissaat siunertaralugu. Tamannali ataatsimiititaliani periutsimut



nalinginnaasumut ilanngunneqarsimanngilaq, Naalakkersuisut Inatsisartullu allaffeqarfiini qaangiuttoorsiaqarnissamut taarsiullugu sulinnigiffeqarnissamut feeriarnissamullu piffissaqarnissamik pissusissamisoortumik naatsorsuuteqartoqarneranut kiisalu ilaasortat ilisimasassarsiorlutik angalasarnerinut, pikkorissartarnerinut isumasioqatigiittarnerinullu, pisortanilu atuuffinnut allanut il.il. atasutut tamanna isigineqartariaqarluni.

Tassunga atatillugu immikkut oqaatigineqassaaq ataatsimiititaliaq siunnersuummik innersuunneqartumik oqaluuserinninnissamut suliarinninnissamullu aalajangersakkamit mattunneqanngimmat, siunnersuut tamanna Inatsisartut ukiuata naanerani taamaalilluni Inatsisartut malitsigisaanik siunnersuummik aappassaaneerinninnissaat pingajussaaneerinninnissaalluunniit sioqqullugu atorunnaartussatut naatsorsuutigineqarnerisoq apeqqutaatinnagu. Taamaalilluni naatsorsuutigineqarpoq, ataatsimiititaliat kissaateqarpata siunnersuutit ataatsimiititaliamut innersuunneqarsimasut aamma Inatsisartut ukiuanni tulliuuttumi suliareqqinniarlugit, tamanna pisinnaassasoq Siulittaasoqarfik tamatuminnga qinnuteqarfigiinnarlugu. Siulittaasoqarfik taava siunnersuut Inatsisartut ataatsimiinnissaannut tullermut oqaluuserisassanut ilannguteqqiinnassavaat, ataatsimiinneq taanna Inatsisartut ukiuanni nutaami pigaluarpalluunniit. Periaaseq tamanna toqqarneqarpoq ataatsimiititaliat maannamut pissusissaatut qinnuteqartareermata inatsisissatut aalajangiiffigisassatullu siunnersuutit ataatsimiititaliamut innersuunneqarsimasut suliarineqarnerisa kinguartinneqarnissaannik, taamaalillunilu suleriaasissaq nalinginnaasumik inatsisartoqarnermi suleriaatsinut ilaalereersimalluni.

Imatut pisoqartillugu siunnersuut ataatsimiititaliami suliarineqartussatut innersuunneqarani, kisiannili siunnersuuteqartumit Inatsisartut ukiuanni aggersumi attatiinnarneqartussatut kissaatigineqarluni, taava pissusissamisoortutut isigineqarpoq siunnersuuteqartoq aamma Siulittaasoqarfimmut qinnuteqarsinnaassappat siunnersuutimi aamma inatsisartut ukiuanni aggersuni attatiinnarneqarnissaanik. Taamaattoqassappat tamanna Siulittaasoqarfimmut nalunaarutigineqartariaqassaaq kingusinnerpaamik ataatsimiinnermut tullermut siunnersuutitik tunniussivissaq tikitsinnagu.

Qulaani pineqartut Inatsisartut Kukkunersiuiinnermut Ataatsimiititaliaannut atuutissanngillat, taanna aasaanerani qaammatini aamma ulapittarluni, tamatumani Nunatta Karsiata Naatsorsuutaasa akuerineqarnissaannik Siunnersuut ilaatigut suliarisarlugu. Tamatumani ima periuseqartoqalersimavoq siunnersuut upernaakkut ataatsimiinnermi siullermeerneqartarluni aammalu ukiakkut ataatsimiinnermi aappassaaneerneqartarluni, ataatsimiititaliap isumaliutissiissutaata ukiakkut ataatsimiinnerup aallartinnerani naammassineqarsimanissaa naatsorsuutigineqartarluni.

Aalajangersakkat atuutseqqilerneqarnerani Siulittaasoqarfiup isumaa malillugu iluaqutaasussaq tassaavoq Inatsisartut ukiuat oqaluuserisassatoqqanik artukkerneqarnani

aallartinneqartassamat. Oqaluuserisassatoqqat assersuutigalugu Inatsisartut suliaasaqarpallaarnerat pissutigalugu siunnersuutit pingaaruteqannginnerusut Inatsisartut ataatsimiinneranni siusinnerusumi kingulliunneqarsimanerannut takussutissaasarajuppoq. Siunnersuutilli pingaaruteqannginnerit taakku Inatsisartut ukiuanni nutaami Inatsisartut ingerlaannartumik artukkertariaqanngilaat, tassami tunulliusseq siunnersuutip politikikkut soqutigineqannginneranut imaluunniit taparserneqannginneranut takussutissaasinnaamat.

Pisuni allani siunnersuutitoqqat naammassinngitsoorneqarnerannut pissutaasinnaavoq siunnersuut pisariusoq akerleriiffiusorluunniit paasineqarmat aammalu assersuutigalugu inatsimmut siunnersuummik saqqummiussisoqarnissaanut allannguutissatut siunnersuummik saqqummiussisoqarnissaa imaluunniit tusarniaanerup sivitsorneqarnissaa imaluunniit allanik paasissutissanik pissarsisoqarnissaa Inatsisartunit kissaatigineqarmat. Taamaattoqartillugu siunnersuutip oqallisigiinnarneqarnissaa akuerineqarnissaalu siunertarineqarpoq aammalu Siulittaasoqarfiup tamatumani allannguutissatut siunnersuutaa ima sunniuteqassaaq siunnersuut immaq ilusia allanngorlugu saqqummiuteqqinneqassalluni aammalu aallaqqaataaniit nutaamik suliarineqassalluni, siunnersuuteqartoq ataatsimiititaliarluunniit siunnersuummik innersuussivigineqartoq namminneq piumassutsiminnik siunnersuutip ingerlaqqinnissaa isumagisimangippassuk.

Taamatut pisoqartillugu siunnersuut Inatsisartut siunnersuummik aallaqqaataanik suliarinninnermik aallartitsisussaallutik sulinerunerannik kinguneqarsinnaavoq. Siulittaasoqarfilli isumaqarpoq siunnersuutip pisariunera suliareqqittariaqarneraluunniit paasineqarpat sulineruneq tamanna pisariaqarsimassaaq. Taamaattoqassappat nutaamik siullermeerineq tassaaginnassaaq siunnersuutip pineqartup pisariaqartinneqartumik sukumiisumik suliarineqarsimaneranut oqariartuut, taamaalilluni suliarinninneq pisoqaanerusoq immaqalu ilaatigut aallarniutigissallugu massakkorpiaq pisunut attuumassuteqarunnaarsimasoq tunngavigalugu siunnersuutit pisariusut naammassillugit suliarineqaannartaqqunagit.

Taamaattumik Siulittaasoqarfik isumaqarpoq siunnersuutit pisoqqat atorunnaartarnissaannik maleruagassap ataatsimut isigalugu qulakkiissavaa siunnersuutit pingaaruteqannginnerusut Inatsisartut oqaluuserisassaannut artukkiiuaannarunnaassammata, siunnersuutillu pingaaruteqarlutillu pisariunerit pissusissamisoortutut sukumiisumik suliarineqarnissaat qulakkeerneqassamat.

Aammattaaq nalinginnaasumik nassuiaatini immikkoortoq 2.6 innersuussutigineqarpoq, taanna malillugu ataatsimiititaliat isumaliutissiissutinik saqqummiussinissamut pisussaaffiat atorunnaarsinneqarluni, taamaalilluni siunnersuutit pingaaruteqannginnerusut siusinnerusutulli ” ataatsimiititaliani ipisinneqarsinnaasarmata”. Siunnersuutit assut pingaarutillit sukumiinerusumik suliarineqarnissaannut taamaalilluni nukissaqartoqalissaaq.

Allannguutissatut siunnersuutip matuma allannguut tamanna ikorfartorjaa, tassami siunnersuutit qaleriiaat salliutinneqartussaannngitsutut ataatsimiititalianit aalajangiivigineqartut ukiumut ataasiarluni iluarsaanneqartassammata.

Nunattali Karsiata naatsorsuutaasa akuerineqarnissaannut siunnersuut eqqarsaatigalugu Siulittaasoqarfik isumaqarpoq upernaakkut siullermeerinnittarluni aammalu ukiakkut aappassaaneerinnittarluni maannamut periuseq naammaginatsumik ingerlanneqarsimasoq attatiinnarneqartariaqartorlu. Taamaattumik siunertamut tamatumunnga immikkut pisumut aalajangersagaqarpat pissusissamisuussasoq Siulittaasoqarfik isumaqarpoq. Taamaaliornikkut oqaluuserisassamut tamatumunnga isumaliutissiissut Inatsisartut ukiuata aallartinnerani piareersimanissaa suleriaatsimi sillimaffigineqassaaq. Siunnersuutit allat eqqarsaatigalugit tamanna nalinginnaasumik naatsorsuutigineqarsinnaanngilaq.

*2.10 Apeqquteqaat aallaavigalugu oqallissutissanik nalunaaruteqarnissamut piffissaliussat*  
Nalinginnaasumik nassuiaatini immikkoortoq 2.8 naapertorlugu apeqquteqaat aallaavigalugu oqallinnerit pitsaanerunissaat qulakkeerniarlugu Siulittaasoqarfiup isumaliutigisaanut atatillugu oqallinnerit massakkorpiaq pisunik imaqarnerunissaasa qulakkeerneqarnissaa aamma kissaatigineqarsimavoq.

Apeqquteqaat aallaavigalugu oqallinnerit pisortat suliassaataannik oqaluuserisassannngortitsinissamik aammalu Naalackersuisunut ilaasortamit ataatsimit arlalinnilluunniit tamanna pillugu nassuiaateqqusinissamik siunertaqarput, tak. § 36, imm. 1. Massakkorpiaq pisut innuttaasunit maluginiarneqarlutillu oqallisigineqartut arlalitsigut soqutigineqartassapput. Taamaattoqartillugu Inatsisartut ataatsimiinnerata aallartinnginnerani tunniussinissamut akunnerinik tallimanik maanna piffissaliussap kingunerisinnaavaa apeqquteqaat aallaavigalugu oqallinnerit piffissami suliap politikikkut soqutiginaataata annikillereernerani aammalu Inatsisartut oqallinnerata innuttaasut isumaannut sunniuteqarnissaanut ajornakusuulersimanerani aatsaat Inatsisartuni ingerlanneqartarnerat. Tamanna sammisat piffissap apeqquteqaatit Inatsisartunut nalunaarutigineqarneranilli soqutiginaateqarpiarunnaareersut pillugit oqallinnernik kimeqannngitsunik ilaatigut kinguneqartarpoq.

Tamanna tungavigalugu Siulittaasoqarfik isumaqarpoq apeqquteqaat aallaavigalugu oqallinnissamik ingerlaavartumik nalunaaruteqarnissamut periarfissaq pisuni amerlasuuni oqallinnerit massakkorpiaq pisunik sammisaqarfiunerannik, pimoorussinermik eqeersimaartumillu naammassisaqarnissamut qulakkeerisinnaasoq. Tamanna pillugu oqaatigineqassaaq 1999-imi suleriaatsip allanngorneqarnerata tungaanut apeqquteqaat aallaavigalugu oqallissutissatut siunnersuutinik ingerlaavartumik nalunaaruteqarnissamut periarfissaqarsimammat. Aaqquissuussineq tamanna pillugu pitsaasuinnarnik misilittagaqarfiusutut isigineqarpoq. Taamaattorli suliassat ataasiakkaat ullormut pisunik

imalinnik oqallissutissanik ilaasortat saqqummiussinatik inuiaqatigiinnilu massakkorpiaq ineriartornerit pillugit tunngaviusumik isummanik oqallisiginnittarnissaat kissaatiginarpoq.

### *2.11 Oqaluuserisassanut nassuiaatit*

Suleriaatsimi § 4, imm. 1-imi toqqaannartumik allassimavoq Siulittaasoqarfiup ”... *Inatsisartuni ataatsimiinnissanut oqaluuserisassat .... aalajangersassavai oqaluuserisassallu pillugit nassuiaammi inassuteqaatitik Inatsisartunut saqqummiullugit. Nassuiaat isumaqatiginiutigineqassanngilaq.*”

Taamaattumik taamatut aalajangersagaqaraluartoq ilaasortat pissutissaqartippassuk oqaaseqarnissartik oqaluuserisassat isumaqatigiinniutigineqarnissaat siunertaralugu imaluunniit nalinginnaasumik naalakkersuinikkut pissutsit oqaaseqarfiginiarlugit ataatsimiinnermik aqut-sisup pineqartoq ingerlaannaq unitsittariaqarpaa. Ulluinnarnili taamaattoqartuaannanngilaq.

Periutsimik tamatuminnga Siulittaasoqarfiup oqaluuserinninnermini kissaatigaa oqaluuserisassanut nassuiaat oqaluuserineqannginnissaat maanna suleriaatsimi erseqqissaatigineqassasoq. Tamatuma nalornissutigineqarneranut pingaartumik pissutaasinnaavoq Suleriaatsimi § 43, imm. 4-mi immaqalu imm. 3-mi aalajangersagaq imatut oqaasertallit:

”*Imm. 3. Ataatsimiinneq aallarereersimatillugu ataatsimiinnermi oqaluuseri-sassat tullerriaarnerat Inatsisartut allanngortissinnaavaat.*

*Imm. 4. Inatsisartut akuersiseqqaarnagit suliassat nutaat ataatsimiinnermi oqaluuserisassanut ilanngunneqarsinnaanngillat.*”

Aalajangersakkat taakku oqaluuserisassat allanngortinnissaannut Inatsisartut periarfissimmatigit oqaluuserisassanut nassuiaateqartoqarnerani § 4, imm. 1-immi oqaasertat apeqqutaatinnagit ilaasortat oqaaseqarnissaminnut aamma periarfissaqartariaqartut oqaatigerusunnarpoq.

Taamaattumik § 43, imm. 3-p oqaasertaliorneqarnera allanngortinneqassasoq Siulittaasoqarfimmit siunnersuutigineqarpoq, taamaalilluni Inatsisartunut pinnani ataatsimiinnermilli aqutsisumut piginnaatitsissut pineqartoq allassimaleqqullugu. Taamaaliornikkut maannamut eqaatsuuneq allanngortinneqassanngilaq, tamanna malillugu oqaluuserisassani immikkoortut tullerriaarnerisa allanngortinnerisigut ataatsimiinnermik aqutsisoq tassanngaannartumik pisunut qisuariaateqarsinnaalluni. Tamatuma peqatigisaanik oqaluuserisassani immikkoortoq ullormi ataatsimiiffiusumi oqaluuserisassanit ataatsimiinnermik aqutsisumit peerneqarsinnaasoq erseqqissaatigineqassaaq, tamannalu manna tikillugu atuutsinneqarpoq periarfissaq § 43-mi ersarissumik taaneqanngikkaluartoq. Kiisalu allannguutit ”piumasaqartoqarnera malillugu” pisarnissaat erseqqissaatigineqassasoq

siunnersuutigineqarpoq, tamatumalu kingunerissavaa allannguutip suliami eqqumaffigisassanik tunngaveqarnissaa.

§ 43, imm. 4 eqqarsaatigalugu Siulittaasoqarfik isumaqarpoq oqaluuserisassani immikkoortut nutaat Inatsisartut allannguummik taassuminnga akuersippata aatsaat oqaluuserisassanut nassuiaammut ilanngunneqarsinnaasut suli piumasaqaatigineqartariaqartoq.

Tassangaannartumik allannguutip tamatuma iluaqutissartai piariaqassusialuunniit ajoqutissartaanit akueriuminarnerusut Inatsisartunut ilaasortanit amerlanerussuteqartuni isumaqatigineqarnissaa maleruagassap tamatuma qulakkiissavaa. Ajoqutit taakku pingaartumik kingunerissavaat oqaluuserisassani immikkoortumut nutaamut ilaasortat piareersimalluarnissaat naatsorsuutigineqarsinnaanngimmat.

Taamaalilluni oqaluuserisassani immikkoortunik nutaanik ilanngussinissap taasisutigineqarnissaa ilaasortat piumasaqaatigisinnaavaat aammalu ilaasortat isumaannut nassuiaataassumik oqaaseqarumanerit ataatsimiinnermik aqutsisup akuerisinnaassavai. Taamaattorli ataatsimiinnermik aqutsisup oqaluuserisassani immikkoortumik nutaamik ilanngussiniarnerminik taamaatitsiinnassutaasumik nassuiaatitut siunnersuutigineqartup isumaqatigiinniutigineqarnissaanik piumasaqartoqarsinnaannginnera atuutiinnassaaq, soorluttaaq ataatsimiinnermik aqutsisup ingerlaannartumik taasisitsinermikkut annertunerusumik oqallittoqarnissaa pinngitsoortissallugu toqqarsinnaagaa.

### *2.12 Oqaaseqartussat tulleriinneri*

Ukiorpasuannortuni Inatsisartoqarnermi suleriaasiusimavoq Inatsisartuni partiit ilaasortatitaqarnerit oqaaseqartuisa siulliullutik oqaaseqartinneqartarnerat partiit tamarmik oqaaseqartuisa oqaaseqarnissaat naammassitserlugu. Partiit marluk amerlaqatigiinnik ilaasortatitaqartillugit partii Inatsisartunut qinersinermi amerlanerusunik qinerneqartoq siulliutinneqartarpoq.

Tassunga atatillugu Siulittaasoqarfimmit isumaliutigineqarsimavoq Inatsisartuni partiit ataasiakkaat sinniisuutitaqarneri allannguuteqarpata ilaasortaminik partiimut allamut nuuttoqarnera pissutigalugu tamanna oqaaseqartussat tulleriinnerinut qanoq sunniuteqartariaqarnerisq.

Apeqqummut tamatumunnga suleriaasissaq imaaliillaannaq akissutissamik aallerfigineqarsinnaanngilaq. Suleriaatsimi maannamut atuuttumi § 48, imm. 1-imi taamaallaat aalajangersarneqarpoq suleriaatsimut ilanngussami tulleriinnilersuineq nalunaarneqartoq malillugu (Oqaaseqarnermi piffissaliussat) oqallinneq ingerlanneqassasoq, ilanngussamili taaneqarnani partiit oqaaseqartui qanoq tulleriiaarneqassanersut.

Partiit ilaasortaaffigisat allanngorneranni maannamut periuseq tassaavoq oqaaseqartussat tulleriinnerat naleqqussarneqartarmat, taamaalilluni partiit qaqugukkulluunniit Inatsisartuni ilaasortaataitaqartut ilaasortaataitaqassusiat oqaaseqartartut tulleriinneranni malinneqarluni. Periuseq tamanna atuutiinnassasoq Siulittaasoqarfimmit siunnersuutigineqarpoq aamma partiip inersuarmi ilaasortai ikilisimatillugit, taamaalillutillu oqaaseqartussat tulleriinnerini nikittariaqartillugit. Taamaaliornikkut tulleriinnerit inersuarmi ilaasortat amerlassusiat malissavaat partiinut taaseqqaarsimasut amerlassusiat malinnagu.

Pisunili partiit marluk amerlanerilluunniit Inatsisartuni ilaasortaataitaat amerlaqatigiippata partii sorleq Inatsisartunut kingullermik qinersinermi amerlanerusunik qinerneqarsimasoq suli pingaartinneqartassalluni.

Isumaliutiginninnerit taakku naapertorlugit suleriaatsimi § 48, imm. 1 erseqqissarneqassasoq Siulittaasoqarfimmit siunnersuutigineqarpoq.

### *2.13 Atuuffinnik nalunaarsuiffik pinngitsoorani nalunaarsuiffissanngortinneqassaaq*

Ilisimaneqartutut ullumikkut Inatsisartut Siulittaasoqarfiannit aqunneqartumik nammineq pi-massutsimik nalunaaruteqartarnermik aaqqissuussineqarpoq. Aaqqissuussineq naapertorlugu ilaasortat namminneq aningaasatigut soqutigisat inatsisartutiguunngitsumillu atukkatik (atuuffiit inuussutissarsiutillu) qinersisartunut ammasumik ingerlatsinissaq eqqarsaatiga-lugu nammineq pi-massutsimik tamanut saqqummiussinnaavaat. 2013-imi qinersinerup kingorna Inatsisartunut ilaasortaalersut amerlanerit taamatut atuuffinnik nalunaarsuiffimmut atuuffimminnik paasissutissiisimapput.

Atuuffinnik nalunaarsuiffimmit paasissutissat ullumikkut [www.inatsisartut.gl](http://www.inatsisartut.gl)-imi immikkoortup ”Inatsisartunut ilaasortat” ataani tamanit takuneqarsinnaapput, tassaniippoq ilaasortap CV-ata eqqaani iserfissaq ”atuuffiit aningaasatigullu soqutigisat”.

Atuuffinnik nalunaarsuiffiup siunertaraa soqutigisat aporaaffeqarsinnaanerannik, Inatsisartunut ilaasortat ataasiakkaat pisortatigoortumik namminnerluunniit atorfiisa ingerlataasalu kingunerisaanik pinngorsinnaasunik kikkulluunniit takunnissinnaanissaata siuarsarneqarnissaa. Siunertamut tamatumunnga atatillugu atorfiit, atuuffiit aammalu namminersortut pisortallu ingerlatseqatigiiffiini siulersuisunut ilaasortaaffiit akissarsiaqarfiusut kiisalu namminersorluni suliffeqarfiutit isertitaqarfiusut pillugit paasissutissiisarnissamut Inatsisartunut ilaasortat kaammattorneqartarput. Tamatuma peqatigisaanik pisuussutitigut nalilitsigut isumaqatigiissutitigullu pissutsit imminnut attuumassutillit pillugit paasissutisseeqqullugit kaammattorneqartarput, ingerlatseqatigiiffimmi soqutigisat 50.000 kr.-it sinnerlugit naleqarpata. Kiisalu paasissutissat siusinnerusukkut sulisitsisorisimasamik aningaasaqarnikkut isumaqatigiissutitut aalajangersimasunut attuumassuteqarput.

Aaqqissuussineq atuutsinneqalermalli isumaliutigineqarsimavoq aaqqissuussineq ilaasortanut pinngitsoorani atuuttussaatinneqassanersoq.

Paasissutissiinissamut pisussaaffiup inatsisinut tunngasortai paasinarsitinniarlugit Siulittaasoqarfiup professor, Dr. jur. Jørgen Albæk Jensen qinnuigisimavaa suliassa qarfinni pineqartuni inatsisiliornissamut Inatsisartut periarfissaat nalilersoqqullugit. Tamanna pillugu professori allakkiorsimavoq. Taamatuttaaq professor Gudmundur Alfredsson qinnuigineqarsimavoq nunarsuup sinnerani uagutsinnut assersuunneqarsinnaasuni tamatumani suleriaasiusut illugit nassuiaateqaqqullugu.

Inatsisinik misissuinerit takutippaat Inatsisartut Namminersornermut inatsit tassungalu nassuiaatit allaavigalugit suliassa qarfinnut tassunga inatsisiliorsinnaatitaasut. Taamaalilluni taamatut pinngitsoorani atuuffinnik nalunaarsuiveqalersinnaaneranut apeqqutaaginnarpoq tamatuminna Inatsisartut aalajangiissanersut.

Inatsisartut Siulittaasoqarfiat oqaluserinnereerluni isumaqarpoq paasissutissiisarnissamut maanna aaqqissuussinerup Inatsisartunut ilaasortanut tamanut pinngitsoorani atuuttussanngortinneqarnissaa pissusissamisuussasoq. Taamatut alloriarneq Inatsisartut taakkulu ilaasortaasa qinersisartunit isigineqarnerisa qaffassarneqarnissaanut naleqquttut isigineqarpoq. Aaqqissuussineq ammasumik ingerlatsinissamut innuttaasunut oqariartuutaassaaq sunniuteqarluartoq, Inatsisartunullu ilaasortat ataasiakkaat naalakkersuinikkut sorlermut ilaanerata saniatigut suut soqutigisarinerat innuttaasut pisariitsumik takusinnaassavaat. Qinikkat immikkut soqutigisaat innuttaasut qinikkallu akornanni tatiginninnermut akornutaaratarsinnaasut pillugit taamaanneraasernerit ammasuunermit pinaveersimatinneqarsinnaapput.

Tassunga atatillugu nammineq piumassutsimik nalunaaruteqartarnermik aaqqissuussineq tamakkiisumi naammaginassuseqanngitsut Siulittaasoqarfinnit nalilerneqarmat tamatumunnga pissutaavoq paasissutissat amigaatigineqartut ikitsuinnaat kissaatigisat akerlerluinnaanik sunniuteqarsinnaanerat. Ilaasortat ilaat aaqqissuussinermik malinninngitsut eqqarsalersitsisinnaapput soqutigisat suut toqqortorusunnerat aammalu soqutigisatigullu aporfittut ilimagineqartut taakku naalakkersuinikkut aalajangiiniarnermik suliaqarnermut qanoq sunniuteqarnerisut. Tusatsiakkanik taamatut pinngortoqartarnera uggornarpoq, tassami paasissutissat saqqummiunneqanngitsut Siulittaasoqarfiup paasinninnera malillugu paasissutissanik toqqortuerusunermik pissuteqanngimmata, tassaaginnarlunili inuttut atuuffiit inuussutissarsiutillu pillugit ammasuuneq tamat oqartussaaqataaneranni nutaaliaasumi salliutinneqartussat naatsorsuutigineqarnera ilaasortat ataasiakkaat nassuerutiginnissimanninnerat.

Ilaasortat ataasiakkaat akornanni ataatsimut isigalugu soqutigisaqannginneq nammineq piumassutsimik nalunaaruteqartarnermik aaqqissuussinerup siunertarisaata misissoqqissaarneqarnissaanut atussallugu naleqquttuuvoq aammalu Inatsisartunut tatiginninnginnermik pisariaqanngitsumik pilersitsilluni. Tamatuma peqatigisaanik atuuffiit pillugit nalunaaruteqartarnermut aaqqissuussinerup Kalaallit Nunaanni inatsisartoqarnikkut periutsip ammasuuneranik, ilumoortuuneranik nutaaliaaneranillu oqariartuutitut attatiinnarneqarnissaa Siulittaasoqarfimmit pingaartinneqarmat suleriaatsimi § 56-imik nutaamik ilanngussisoqarnissaa siunnersuutigineqarpoq, taanna malillugu atuuffinnik nalunaarsuivik ilaasortanit tamanit pinngitsoorani atorineqartussanngussalluni.

Atuuffinnik nalunaarsuivimmut aaqqissuussinermi immikkoortukkuutaat ingerlaavartumik iluarsineqartarnissaat qulakkeerniarlugu taamaallaat atuuffinnik nalunaarsuiffimmut maleruagassanut pingaarnernut, tassunga ilanngullugu paasissutissanik tunniussinissamut piffissaliunneqartumut § 56-imit taamaallaat aalajangersaassasoq siunnersuutigineqarpoq. Paasissutissat annertussusissaat aammalu nalunaaruteqariaaseq pillugit immikkoortukkuutaat erseqqinnerit Suleriaatsimut Ataatsimiititaliamit aalajangersarneqassasut siunnersuutigineqarpoq, taanna katitigaanermigut siammasissuunini pissutigalugu aaqqissuussinerup Inatsisartunut ilaasortanit annertuumik taparserneqartumik ilusilersuinissamut naleqqunnerpaatut isigineqarmat.

Malugeqquneqarpoq naalakkersuinikkut sulinermut aningaasatigut tapiissuteqartarnek pillugu Inatsisartut inatsisaata allanngortinneqarneranik inatsisartut inatsisissaannut siunnersuummik (UPA2015/149) saqqummiussisoqarmat. Inatsisissatut siunnersuut taanna malillugu Inatsisartut pinngitsoorani atuuffinnik nalunaarsuiffissaannut atuuffiit pillugit paasissutissiisoqarsimangippat partiinut ilaasortanut tapiissutinik tunniussiumannginnissamut inatsisissatut siunnersuut taanna malillugu periarfissaqalissaaq. Inatsisip allannguutissaa taanna akuerineqarpat ilaasortat atuuffinnik nalunaarsuiffimmut paasissutissiinissamut pisussaaffinngortussap malinissaanut aningaasaqarnikkut kajumissuseqalernissaat qulakkeerneqassaaq, taamaaliornikkut namminnek isigineqarnertik tusaamaneqarnertillu kisiat pinnani aammali Inatsisartut tamarmiusut isigineqarnerat illersorneqassalluni.

#### *2.14 Sulinnigiffeqarneq Inatsisartunilu peqataangikkallarnek kiisalu sinniisussamik aggersaasarneq pillugit Inatsisartut maleruagqusaat*

Sulinnigiffeqarnermut, peqataangikkallarnermut sinniisussamillu aggersaasarnermut maleruagassat atuuttut Inatsisartut Siulittaasoqarfiata sukumiisumik oqaluuserai, taakku qanoq paasineqarnissaasa akulikitsumik nalornissutaasarnera pissutigalugu.

Ilaasortat tunuarnerat, sulinnigiffeqarnerat, peqataangikkallarnek sinniisussamik aggersaasarneq aallaaviatigut Inatsisartunit akuerineqartassapput, tamannalu Inatsisartunut



aammalu Naalackersuisunut ilaasortanut atuuppoq. Taakku pillugit maleruagassat Inatsisartut Suleriaasianni (Kapitali 13) kisimi nassaassaangillat aammali Inatsisartut Naalackersuisullu pillugit Inatsisartut inatsisaanni aammalu Inatsisartunut Naalackersuisunullu ilaasortat aningaasarsiaqartitaanerat il.il. pillugit Inatsisartut inatsisaanni (aningaasarsiaqartitsinermut inatsimmi) nassaassaapput.

Maleruagassat taakku tamarmik paasiuminartuunissaat pillugu maleruagassanut ataatsimoortunut katersuunnissaat kissaatiginarsinnaavoq. Taamaakkaluartoq maleruagassat assigiinngitsut taakku tamarmik immikkut tunngavissaqarluartumik siunertaqarnerat pissutigalugu taamaaliortoqarnissaa kaammattuutigineqarsinnaanngitsoq Siulittaasoqarfik inermiliivoq.

Taamaalilluni aningaasarsiaqartitsinermut inatsimmi maleruagassat ilaasortat arlaatigut sulinnigiffeqarneranni il.il. aningaasarsiaqartinneqarnissaannut inatsisitigut tunngavigisassaq qulakkeerpaat. Inatsisartut Naalackersuisullu pillugit Inatsisartut inatsisaanni maleruagassat Inatsisartunut Naalackersuisunullu ilaasortaanermi atuuffiup suussusia aalajangersarpaat, tassunga pingaartumik ilanngullugu inuiaqatigiinnit toqqagaanikkut suliassiissutitut pisussaaffik pineqartoq aalajangersarlugu. Taamatut maleruagassiineq tunngavissaqarluartut aammalu Inatsisartut sulineranni inatsisitut tunngavigissallugu pinngitsooruminaattut Siulittaasoqarfimmi isigineqarpoq.

Tamatuma peqatigisaanik Siulittaasoqarfiup misilittagaqarfigaa sulinnigiffeqarnissamik akuerineqarnissamut apeqqutit apeqqutinik immikkoortukkuutaanik inatsimmi maleruagassiorneqarsinnaanatillu maleruagassiorneqartariaqanngitsunik aammalu suleriaatsimi aalajangersakkani taamaallaat ilaannakortumik akissuteqarfigineqartunik pilersitsisinnaapput. Inatsisartunut ilaasortat sulinnigiffeqartarnerat il.il. eqqarsaatigalugu tamakku pillugit nalornissuteqarneq kisimi pivoq. Tamatumani Inatsisartut aalajangersakkat qanoq eqquutsinneqarnissaannik aqunneqarnissaannillu kissaateqarnerisut Siulittaasoqarfimmit arlaleriarluni nalornissutigineqartarpoq.

Pisuni Naalackersuisunut ilaasortat sulinnigiffeqarnissamik il.il. kissaateqartillugit Inatsisartut aalajangiinissamut peqataatinneqartarput, tamannalu qanoq paasinninnissamut nalornissuteqarnermut tunngavissiiisimangilaq. Taamaattumik Naalackersuisut sulinnigiffeqartarnerannut maleruagassat il.il.erseqqissaatigineqarnissaat pisariaqartinneqanngitsoq Siulittaasoqarfik isumaqarpoq.

Akerlianik Inatsisartunut ilaasortat sulinnigiffeqartarnerannut maleruagassat il.il. erseqqissaavigineqarnissaannik pisariaqartitsisoqartoq qangaanilli ilisimaneqarpoq. Taamaalilluni aningaasarsiaqartitsinermut inatsimmi atuuttumi § 2, imm. 2-mi oqaaseqatigiit aappaat maleruagassamik imaattumik imaqarpoq ”Inatsisartut Siulittaasoqarfiat

sulinngiffeqarallernerup akuersissutigineqarnissaanut najoqqutassanik suliarinnissaaq”. Inatsisiliortulli tungaanit innersuussut taanna Siulittaasoqarfimmit malitseqartinneqarsimanngilaq, ilaatigut Siulittaasoqarfiup qanoq paasinninnerit arlaannik toqqaanissamut maleruagassat imarisaat immikkoortutigut arlalitsigut ersernerluppallaarnerat pissutigalugu.

Taamaakkaluartoq tassunga atatillugu pissutsit assigiinngitsut sulinngiffeqarnissamik Inatsisartunillu peqanngikkallarnissamik akuersissuteqartarnermi kiisalu sinniisussamik aggersaasarnermi atuuttut pillugit maleruagassanik ataatsimoortunik ersarissunillu Siulittaasoqarfik siunnersuuteqarpoq. Tamatumunnga tunngavissatut aningaasarsiaqartitsinermut inatsimmi, tak. tamanna pillugu allannguutissatut siunnersuut saqqummiunneqartoq (UKA2014/123) saqqummiunneqartoq, aammalu suleriaatsimi kapitali 13-imi maleruagassat atuuttut pisariillisarneqarnissaat siunnersuutigineqarpoq.

Taamaaliornikkut sulinngiffeqarnissamik akuersissuteqartarneq il.il. pillugit maleruagassanik ataatsimoortunik suleriaatsimut Ilanngussaq 2-mi nutaami aalajangersaanissamut periarfissamik pilersitsisoqassaaq.

Pingaartumik aningaasarsiaqartitsinermut inatsimmi § 2, imm. 2-p allanngortinneqarnissaanut siunnersuut maluginiaqquneqarpoq. Siunnersuut taanna malillugu sulinngiffeqarnissamut Inatsisartunillu peqanngikkallarnissamut akuersissuteqartarnermut maleruagassanik Inatsisartut siunissamut aalajangersaassapput. Taama periarfissaqarnerup aningaasarsiaqartitsinermut inatsimmi § 2, imm. 2 –mi oqaaseqatigiit aappaanni kaammattuut maannamut atuuttoq ”Inatsisartut Siulittaasoqarfiat sulinngiffeqarallernerup akuersissutigineqarnissaanut najoqqutassanik suliarinnissaaq” taarserpaa.

Ilanngussaq nutaaq suleriaatsimut ilanngullugu aammalu tassunga atasutut isigalugu Inatsisartunit akuersissutigineqassaaq. Sulinngiffeqartarnermut maleruagassat imarisassaannut Inatsisartut tamakkiisumik aalajangiisinnaanertik Inatsisartut taamaalillutik attatiinnarpaat aammalu ilanngussaq suleriaatsip allanngortinneqarnissaanut maleruagassat malillugit aatsaat allanngortinneqarsinnaavoq. Sulinngiffeqartarnermut maleruagassat ilanngussamut nuunneqarneranni taamaalilluni taamaallaat siunertarineqarpoq maleruagassanik ersarissunik, pisariitsunik ataqatigiissutinillu aammalu suleriaatsimi oqaasertanik annertuallaarlutik allasimangitsunik pilersitsinissaaq. Ilaatigut suleriaatsimi oqaasertani paragrafit tullerriaarneri annertunerusumik allanngungikkaluarlugit sulinngiffeqartarnermut maleruagassat maanna kingusinnerusukkullu allannguutaat pisinnaassapput.

Siulittaasoqarfiup isumaa malillugu inatsisit paasiuminartuunissaannut iluaqutaassaaq sulinngiffeqartarnermut maleruagassat siunissami Inatsisartunit pituttuiisumik aalajangersarneqartarpata, maanna tikillugu Siulittaasoqarfiup najoqqutarisassatut

pituttuisuunnigitsut aalajangersaasarnernut taarsiullugu. Siulittaasoqarfiup pisuni tamani najoqqutarisassat nammineq aalajangersakkani avaqqussinnaanera pillugit oqallinnerup allannguinnissaq akimmisaartippaa. Tamatumunnga taarsiullugu erseqqissumik allassimassaaq Inatsisartut sulinnigiffeqartarnermut maleruaqqusaat Siulittaasoqarfimmit avaqqunneqarsinnaanngitsut, soorluttaaq pisuni allani suleriaatsimi maleruaqqusanik Siulittaasoqarfik avaqqusisinnaassasoq aatsaat Inatsisartut suleriaatsimi Siulittaasoqarfiup taamaaliornissaanut erseqqissumik piginnaatitsisimatillugit.

Sulinnigiffeqartarnermut maleruagassatut il.il. siunnersuutigineqartut imarisaat eqqarsaatigalugit innersuussutigineqassapput Ilanngussaq 2-p tassungalu nassuiaatitaasa oqaasertaat Inatsisartut suleriaasiata allanngortinneqarnissaa pillugu siunnersuummut matumunnga immikkut Ilanngussaq 3-tut ilanngunneqartut.

Ataatsimulli isigalugu Siulittaasoqarfimmit oqaatigineqarsinnaavoq Ilanngussaq 2 siunnersuutigineqartoq sulinnigiffeqarnermut, peqanngikkallarnermut sinniisussamillu aggersaasarnernut periutsinut atuuttunut aalajangersaatitut maleruagassiisutullu ilusilerneqarmat. Maannamut periusaasup oqilisarneqarnissaa siunertaanngilaq, tassami Siulittaasoqarfimmit oqaatigineqassamat Inatsisartunut ilaasortat atuuffiat inuiaqatigiinnit toqqagaanikkut suliassiisutitut pisussaaffittut iluseqarmat, tamannalu Siulittaasoqarfiup suliassaqarfimmi maannamut periusiata tamanut atuutsinneqalernissaanut annertunerusumik periarfissiinngimmat.

Atuuffiup suunera pingaartumik piunasaqarfiuvoq ilaasortat Inatsisartuni ataatsimiissasut imaluunniit Inatsisartut ingerlaavartumik sulineranni arlaatigut peqataanissamut piareersimassasut. Tamanna aamma pissutigalugu sulinnigiffeqarnissamut peqanngikkallarnissamullu akuersissuteqarnissamut periarfissaq killilerneqarpoq pisunut suliassaqarfimmi maannamut periuseq naapertorlugu pisariaqarnera nalornissutigineqarsinnaanngitsunut.

### *2.15 Oqaaseqarnermi piffissaliussat*

Siulittaasoqarfiup oqaaseqarnermi piffissaliussanik misissuinermini oqallitarnernit qanoq sapinngisamik naapertuunnerpaamik aqqissuunneqarsinnaaneranut misilittagarilerneqartut aallaavigalugit naleqqussaasoqarnissaa pisariaqartutut isigaa.

#### a) Aningaasanut inatsisissatut siunnersuut

Aningaasanut inatsisissatut siunnersuummut atatillugu oqaaseqarnermi piffissaliussat Inatsisartut inatsisissaannut siunnersuutitut ullumikkut atorneqartartut assigaat. Aningaasanut inatsisissatut siunnersuutip pisariunera inuiaqatigiinnullu pingaaruteqassusia eqqarsaatigalugit oqaaseqartartut ilanngussaannut atatillugu oqaaseqarnermi piffissaliussat sivitsorneqarnissaannut piffissanngorsorinarpoq. Taamaattumik aningaasanut inatsisissatut

siunnersuutip siullermeerneqarnerani aappassaaneerneqarneranilu oqaaseqartartut oqaaseqarnermi piffissarisaat marloriaatinngorlugit minutsinut 30-nngortinneqarnissaat aammalu 4 minutsinnngortinneqarnissaat aammalu pingajussaaneerneqarnerani allannguutissatut siunnersuummik saqqummiussisoqarsimanersoq apequtaatillugu 20 minutsinnngortinneqarnissaat Siulittaasoqarfimmit siunnersuutigineqarpoq. Naalakkersuisunit akissuteqaatinik saqqummiussinermi oqaaseqarnermi piffissaliussat assinganik sivitsorneqassapput.

b) Nunatta Karsiata Naatsorsuutai

Nunatta Karsiata Naatsorsuutaat pillugit aalajangiiniarnermi ullumikkut oqaaseqarnermi piffissaliussat aalajangiiffigisassatut siunnersuutinut ullumikkut atorneqartut assigaat. Naatsorsuutit pisariunerat inuiaqatigiinnullu pingaaruteqassusiat eqqarsaatigalugit oqaaseqartartut ilanngussaannut atatillugu oqaaseqarnermi piffissaliussat sivitsorneqarnissaat piffissanngorsorinarpoq. Taamaattumik Nunatta Karsiata Naatsorsuutaannik siullermeerinermi oqaaseqartartut oqaaseqarnermi piffissarisaat marloriaatinngorlugit 30 minutsinnngortinneqarnissaat aammalu appassaaneerinermi 4 minutsinnngortinneqarnissaat Siulittaasoqarfimmit siunnersuutigineqarpoq. Naalakkersuisunit akissuteqaatinik saqqummiussinermi oqaaseqarnermi piffissaliussat assinganik sivitsorneqassapput.

c) Tatiginninnginnermik tunngavilimmik taasisitsineq

Suleriaatsimi § 53 malillugu oqaluuserisassamat tullermut ingerlaqqittoqarnissaanik siunnersuut tunngavilersuummigut Naalakkersuisunik imaluunniit Naalakkersuisunut ilaasortamik tatiginninnginnermik tunngaveqartinneqarsinnaavoq. Oqaluuserisassatut siunnersuummik taama ittumik (”tatiginninnginnermik nalunaaruteqarluni oqaluuserisassatut siunnersuut”) akuersinerup kingunerissavaa Naalakkersuisut imaluunniit Naalakkersuisunut ilaasorta q atuuffimminiikkunnaassamat.

Nassuiaatigineqartutut tatiginninnginneq pillugu siunnersuummik saqqummiussisoqartillugu oqaaseqarnissamat piffissaliussat pillugit ersarissumik maleruagassaqaasasoq Siulittaasoqarfiup siunnersuutigaa, tassami oqaaseqarnermi piffissaliussat pillugit ilanngussa q tamanna pillugu immikkut maleruagassanik manna tikillugu ima qarsimanngimmat. Tatiginninnginnermik tunngavilimmik taasisitsineq pillugu oqallinnerup pissangaffiulluni ingerlanneqaratalersinnaanera aammalu ataatsimiinnermik aqutsisup annertuumik artukkerneqarsinnaanera eqqarsaatigalugit pisuni taamaattuni oqaaseqarnermi piffissaliussat pillugit aalajangiinissat maannakkutut ataatsimiinnermik aqutsisumut naliligassannngortinneqassanngillat.

Tamanna tunngavigalugu tatiginninnginnermik tunngavilimmik taasisitsinerni oqaaseqarnermi piffissaliussat makku siulittaasoqarfimmit siunnersuutigineqarput:

1. Tatiginninnginneq pillugu siunnersuummik saqqummiussineq – minutsit tallimat.
2. Ataatsimiinnerup unitsikkallarnejarnera – minutsinik 30-nik imaluunniit ataatsimiinnermik aqutsisup erseqqinnerusumik aalajangiinera malillugu sivilissu-seqarajuppoq.
3. Allanguutissatut siunnersuutinik saqqummiussineq (Pinngitsoortitsitsiniaalluni oqaluuserisassatut siunnersuut) – minutsit tallimat.
4. Oqaaseqartartup oqaaseqarnera – minutsit tallimat. (partii ataaseq apeqqutit marluk).
5. Tatigineqarunnaartup inaarutaasumik oqaaseqarnera – minutsit tallimat. (partii ataaseq apeqqutit marluk)

Tamatuma kingorna siunnersuutit tiguneqartut taasissutigineqartassapput.

d) Qinnuteqareerluni saqqummiussineq

Siunnersuutit akissuteqaatillu oqaasinngorlugit saqqummiunneqarnissaat siumoortumik qinnuteqarnikkut taamaallaat pisinnaasoq suleriaatsip 2010-mi allanngortinneqarneratigut oqaaseqarnissamat piffissaliussat pillugit suleriaatsimut ilanngussami ilanngunneqarpoq. Atortussanik allassimasunik annertuumik atuaanertaqanngitsumik inersuarmi eqeersimaarnerusumik oqallitarnissap siuarsarneqarnissaa allannguinnikkut anguniarneqarpoq.

Oqaasinngorlugit saqqummiussinissap kissaatigineqarnera pillugu e-mailikkut immikkoortup oqaluuserineqarnissaa ullormik ataatsimik sioqqullugu nassiussinikkut siunnersuummik akissuteqaammilluunniit oqaasinngorlugu saqqummiussinissamat akuersissuteqarnej amerlanertigut pisarpoq. Oqaaseqarnissamat piffissaliussat malinneqartillugit akuersissuteqartoqartuaannarpoq.

Oqaatigineqartariaqarporli aqqissuussineq taanna pisariitsoq ilaasortanit naalakkersuisunilluunniit ataqqineqanngimmat, taakkumi siumoortumik qinnuteqaratik oqaluttarfimmit oqaasinngorlugu saqqummiussiinnartarmata. Taama pisoqartillugu ataatsimiinnermik aqutsisut aalajangersimasumik periuseqanngillat. Amerlanertigulli oqaasinngorlugit saqqummiussinissaq imaaliillaannaq akuersissutigineqartarpoq.

Siunnersuutinik akissuteqaatinilluunniit oqaasinngorlugit saqqummiussinissamik kissateqarnermi radiukkut tusarnaartut isiginnaartullu najuuttut eqqarsaatigineqarnerat tunngavilersuutigineqarajuppoq. Tamakku eqqarsaatigineqarnerat Siulittaasoqarfiup paasinninnera malillugu tunngavilersuutitut pitsaasutut ataqqineqartariaqarpoq, soorluttaaq siunnersuutip oqaasinngorlugu saqqummiunneqarnera ataatsimut isigalugu siunnersuutip kingorna oqallisigineqarnissaani aallarniutitut naleqquttutut isigineqarsinnaasoq.

Taamaattumik Siulittaasoqarfiup siunnersuutigaa oqaaseqarnermi piffissaliussat pillugit Ilanngussaq (matuma siuliini Ilanngussaq 1-imik taagorneqartoq) allanngortinneqassasoq,

taamaalilluni oqaaseqarnermi piffissaliussat atuuttut aallaavigalugit akuersissummik siumoortumik pissarsiniaqqaarnatik siunnersuuteqartut siunnersuutiminnik siunissami saqqummiussisaqqilersinnaaqqullugit. Taamaaqataanik immikkut akuersissumik pissarsiniaqqaarani akissuteqaatinik oqaasinngorlugit saqqummiussisoqarsinnaassaaq. Taamaaliornikkut aaqqissuussineq 2010-p tungaanut atuussimasoq aammalu Inatsisartut ataatsimiinnerini annertuumik suli atorneqartoq atuutseqqilerneqassaaq.

### 2.16 Suleriaasitoqqap nutaamut sanilliussineqarnera

Allannguutissatut siunnersuutigineqartut ataani tabelinngorlugit takusassiarineqarput:

<b>Siunnersuut suleriaatsimut atuuttumut sanilliullugu</b>	
Oqaasertai atuuttut	Allannguutissatut siunnersuut
	<b>§ 1</b>  Inatsisartut Suleriaasianni 12. november 2010-meersumi, 22. september 2011 aamma 29. maj 2012-imeersunik allannguutitalimmi, makku allannguutigitinneqassapput:
<i>Imm. 2.</i> Inatsisartut ilaasortamik akornannit Qinigaanerup Misilinneqarnissaanut Ataatsimii-titaliaagallartumik pilersitsissapput. Ataatsimiititaliap ilaasortarissavai ilaasortaq imm. 1-imi taaneqartoq, siulittaasuusussaq, taassumalu toqqagai ilaasortat allat sisamat. Ataatsimiititaliap ilaasortaasa sinniisussaannik toqqaasoqassanngilaq.	<b>1. § 1, imm. 2,</b> ima oqaasertaqassaaq: ” <i>Imm. 2.</i> Imm. 1 naapertorlugu ilaasortaq Inatsisartunut sivisunerpaamik ilaasortaasimasoq Inatsisartut sinnerlugit Inatsisartunullu ilaasortat akornannit Qinigaanerup Misilinneqarnissaanut Ataatsimiititaliaagallartumik pilersitsissaaq. Ataatsimiititaliap ilaasortarissavai sivisunerpaamik ilaasortaasimasoq siulittaasutut, ilaasortallu allat sisamat sivisunerpaamik ilaasortaasimasumit, Inatsisartuni naalakkersuinikkut suliniaqatigiiffinnit sapinngisamik tamatigoornerpaamik sinniisuutitaqarnissap qularnaarneqarnissaa siunertaralugu toqqarneqartunit.”
	<b>2. § 4-mi imm. 8-p</b> kingornanut immikkoortutut nutaatut ilanngunneqassaaq: ” <i>Imm. 9.</i> Imm. 2 naapertorlugu Suleriaatsimut Ataatsimiititaliap suliassaraa

	<p>§§it 32 aamma 60 naapertorlugit Siulittaasoqarfiup siunnersuutai suliarisassallugit. Suleriaatsimut Ataatsimiititaliaq ataatsimiititaliat suliassaqarfii pillugit aalajangiisarpog, tamanna nalornigissutigineqalersillugu. Ataatsimiititaliaq taamatutaaq § 56 malillugu Inatsisartunut ilaasortat paasissutissiisussaataitanerat pillugu malittarisassanik aalajangersaasarpog.”</p>
<p><b>§ 9.</b> Inatsisartut ataatsimiititalianut ataasiakkaanut ilaasortanik tallimanik Naalakkersuisunut ilaasortaaqqusaanngitsunik qinersissapput. Immikkut pissutsit tamanna pisariaqartippassuk Inatsisartut Siulittaasoqarfiata inassuteqareerneratigut Inatsisartut ataatsimiititaliamut ilaasortanik arfineq-marlunnik qinersisinnaapput.</p>	<p><b>3. § 9, imm. 1-imi oqaaseqatigiit aappaat atorunnaarpoq:</b>  <b>§ 9.</b> Inatsisartut ataatsimiititalianut ataasiakkaanut ilaasortanik tallimanik Naalakkersuisunut ilaasortaaqqusaanngitsunik qinersissapput.</p>
<p><i>Imm. 2.</i> Ataatsimiititaliamut ilaasortaq kiisalu taassuma sinniisussaa ataatsikkut peqataasinnaajunnaarallarpata, partiip qinersisarnerilluunniit eqqarsaatigalugit suleqatigiinnissamik isumaqatigiissuteqarsimasut qinnuteqarnerat naapertorlugu, Inatsisartut Siulittaasoqarfiat aalajangersinnaavoq partii qinersisarnerilluunniit eqqarsaatigalugit suleqatigiinnissamik isumaqatigiissuteqarsimasut ilaasortamut taartaasussamik taarsiisitsigallarsinnaasut.</p>	<p><b>4. § 10, imm. 2-mi oqaaseqatigiit aappaattut nutaatut ilanngunneqassaaq:</b>  ”Siulittaasoqarfiup Inatsisartut Allattoqarfiat piginnaatissinnaavaa pisuni ataasiakkaani ataatsimiititaliat sulineranni inuttut sinniisussaqarnissamik partiit qinersisarnerilluunniit pillugit suleqatigiit qinnuteqaataasa akuerinissaannik aalajangiisinnaatillugu.”</p>
<p><b>§ 14.</b> Ataatsimiititaliap suliassaasa pingaarnersaraat siunnersuutit Inatsisartunit ataatsimiititaliamut innersuussat suliarineqartarnissaat.  <i>Imm. 2.</i> Ataatsimiititaliaq, ilaatigut Naalakkersuisunut apeqquteqartarnermigut,</p>	<p><b>5. § 14-imi imm. 2-p kingornanut immikkoortutut nutaatut ilanngunneqassaaq:</b>  ”<i>Imm. 3.</i> Ataatsimiititaliaq apeqqutip allakkatigut akineqarnissaanik qinnuteqarpat, ataatsimiititaliap qinnuteqaataa Naalakkersuisunit naammassineqassaaq.</p>

<p>suliassaqarfimmi iluani ingerlatsinermik malittarinninnissaminut pisussaavoq aammalu Naalakkersuisut inatsisitigut killissarititat iluanni ingerlatsinikkulluunniit ileqqorissaarnermut tunngatillugu killigitat iluanni ingerlatsinissaat nakkutigissallugu.</p>	<p>Naalakkersuisut taamaallaat paasissutissanik ataatsimiititaliap pissarsinnaanera killilersinnaavaat, ataatsimiititaliap taakkuninnga paasisaqarnissaminik soqutiginninnera pisortat namminersortulluunniit soqutigisaannut sakkortuneroqisunut tunullunneqartariaqarpat. Taamatut killiliineq tamatigut allakkatigut tunngavilersorneqarsimassaaq.”</p>
<p><b>§ 17.</b> Inatsisartut allatut aalajangersimatinnagit ataatsimiititaliap inatsisartut inatsisissaattut imaluunniit Inatsisartut aalajangiiffigisassaattut siunnersuutininik suliaqarnermi inerneru pillugit isumaliutissiissummik saqqummiussisassaaq. Ataatsimiititaliap siunnersuutit Inatsisartunit ataatsimiititaliamut innersuunneqarsimasut pillugit isumaliutissiissusiortussaataavoq.</p>	<p><b>6. § 17, imm. 1-imi oqaaseqatigiit aappaat</b> atorunnaarpoq:  <b>§ 17.</b> Inatsisartut allatut aalajangersimatinnagit ataatsimiititaliap inatsisartut inatsisissaattut imaluunniit Inatsisartut aalajangiiffigisassaattut siunnersuutininik suliaqarnermi inerneru pillugit isumaliutissiissummik saqqummiussisassaaq.</p>
<p><b>§ 19.</b> Ataatsimiititaliap qanoq ilisukkulluunniit Naalakkersuisunut ilaasortamik isumasioqateqarumalluni aggersaasinnaavoq. Naalakkersuisunut ilaasortaq atorfilimmik ataatsimik tamatigut ingiallorteqarsinnaavoq. Naalakkersuisunullu ilaasortap atorfilinnik arlalinnik ingiallorteqarnissaa ataatsimiititaliap akuersissutigisinnaavaa.  <i>Imm. 2.</i> Ataatsimiititaliap naliliinera naapertorlugu Naalakkersuisunut ilaasortaq pissutissaqavilluni peqataasinnaangippat immikkorluinnaq ittumik pissutissaqartoqartillugu isumasioqatigiinneq atorfilik ataaseq arlallilluunniit peqataatillugit ingerlanniarneqarsinnaavoq.  <i>Imm. 3.</i> Isumasioqatigiinnermi atorfilittami</p>	<p><b>7. § 19</b> ima oqaasertaqassaaq:  ”<b>§ 19.</b> Ataatsimiititaliap qanoq ilisukkulluunniit Naalakkersuisunut ilaasortamik siunnersuunissamut ilisimatitsiffiusumilluunniit ataatsimiinnissamut aggersaasinnaavoq. Naalakkersuisunut ilaasortaq atorfilimmik ataatsimik tamatigut ingiallorteqarsinnaavoq. Naalakkersuisunullu ilaasortap atorfilinnik arlalinnik ingiallorteqarnissaa ataatsimiititaliap akuersissutigisinnaavaa. Tamanna ataatsimiititaliamut qinnuteqaatigineqartassaaq ataatsimiinnissaq sioqqullugu.  <i>Imm. 2.</i> Ataatsimiititaliap naliliinera naapertorlugu Naalakkersuisunut ilaasortaq pissutissaqavilluni peqataasinnaangippat immikkorluinnaq ittumik pissutissaqartoqartillugu siunnersuineq</p>



<p>oqaaserisaanut Naalackersuisunut ilaasortaq akisussaavoq.</p> <p><i>Imm. 4.</i> Isumasioqatigiinnermut matoqqasumut tamanulluunniit ammasumut aggersaasoqar-sinnaavoq. Tamanut ammasumik isumasioqatigiinnermut aggersaasoqarpat isumasioqatigiinnermi kikkulluunniit najuussinapput. Isumasioqatigiinneq tamanut ammasumik ingerlanneqartoq immiussissutinut immiussissutinulluunniit assigisaannut immiunneqassaaq.</p>	<p>ilisimatitsiffiusumilluunniit ataatsimiinneq atorfilik ataaseq arlallilluunniit peqataatillugit ingerlanniarneqarsinnaavoq.</p> <p><i>Imm. 3.</i> Siunersiuiinnermi ilisimatitsiffiusumilluunniit ataatsimiinnermi atorfilittami oqaaserisaanut Naalackersuisunut ilaasortaq akisussaasuvoq.</p> <p><i>Imm. 4.</i> Siunersiuiinnermut ilisimatitsiffiusumilluunniit ataatsimiinnermut matoqqasumut tamanulluunniit ammasumut aggersaasoqarsinnaavoq. Tamanut ammasumik siunersiuiinnermut ilisimatitsiffiusumilluunniit ataatsimiinnermut aggersaasoqarpat isumasioqatigiinnermi kikkulluunniit najuussinapput. Siunersiuiinnerit ilisimatitsiffiusumilluunniit ataatsimiinnerit tamanut ammasumik ingerlanneqartut immiussissutinut immiussissutinulluunniit assigisaannut immiunneqassaaq.”</p>
<p><b>§ 36.</b> Inatsisartunut ilaasortap pisortat suliaasaataat Inatsisartuni oqaluuseritinniaruniuk kiisalu Naalackersuisunut ilaasortap tamanna pillugu nassuiaateqarnissaa Naalackersuisunulluunniit ilaasortat arlallit nassuiaateqarnissaat piumasariguniuk taamatut kissaateqarnini Inatsisartut Siulittaasuannut erseqqissumik allaganngorlugu tunniutissavaa, taassumalu apeqquteqaat agguanneqareerpat Inatsisartut ataatsimiinneranni Inatsisartunut nalunaarutigissavaa.</p>	<p><b>8. § 36, imm. 1</b> ima oqaasertaqassaaq:  ”<b>§ 36.</b> Inatsisartunut ilaasortap pisortat suliaasaataat Inatsisartuni oqaluuseritinniaruniuk kiisalu Naalackersuisunut ilaasortap tamanna pillugu nassuiaateqarnissaa Naalackersuisunulluunniit ilaasortat arlallit nassuiaateqarnissaat piumasariguniuk, tamanna pisassaaq apeqquteqaatikkut Inatsisartut oqaaseqaatissaannut siunnersuummik ilaqartinneqartumik. Apeqquteqaat erseqqissumik allaganngorlugu tunniunneqassaaq Inatsisartullu Siulittaasuannut, apeqquteqaat agguanneqareerpat appeqquteqaammik Inatsisartunut nalunaaruteqartussamat, tunniunneqassalluni.”</p>
	<p><b>9. § 36, imm. 4</b> ima oqaasertaqassaaq:</p>

<p><i>Imm. 4.</i> Apeqquteqaat aallaavigalugu oqallinnermi Inatsisartunut ilaasortat partiillu inatsisartut oqaaseqaateqarnissaannut siunnersuummik saqqummiussisinnaapput. Siunnersuut taamaattoq allakkatigut naatsumik tunngavilersuutitalerlugu ataatsimiinnermik aqutsisumut nalunaarutigineqassaaq, oqallinnermullu ingerlanneqartumut pissusissamisoortumik attuumassuteqartuussalluni. Inatsisartut oqaaseqaateqarnissaannut siunnersuummut atatillugu allannguutissatut siunnersuuteqartoqarsinnaanngilaq. Apeqquteqaat pillugu oqallinnermi taamaalilluni inatsisartut oqaaseqaataat ataasiinnaq akuersissutigineqarsinnaavoq. Inatsisartut oqaaseqaateqarnissaannut siunnersuut ataa-seq akuersissutigineqarpat, inatsisartut oqaaseqaatissaattut siunnersuutaajunnartut ataatsimiinnermik aqutsisumut nalunaarutigineqartut, sulili taasissuti-gineqanngitsut, atorunnaassapput. Apeq-quteqaammik oqallisiginninnerup nalaani allatut ilusilimmik aalajangiisoqarsinnaanngilaq, takukkilli §§-it 50-miit 52-mut.</p>	<p><i>”Imm. 4.</i> Apeqquteqaat aallaavigalugu oqallinnermi Inatsisartunut ilaasortat partiillu inatsisartut oqaaseqaatissaannut allannguutissanik siunnersuuteqarsinnaapput. Siunnersuut taamaattoq allakkatigut naatsumik tunngavilersuutitalerlugu ataatsimiinnermik aqutsisumut nalunaarutigineqassaaq, oqallinnermullu ingerlanneqartumut pissusissamisoortumik attuumassuteqartuussalluni. Inatsisartut oqaaseqaatissaannut allannguutissatut siunnersuummut allannguutissatut siunnersuuteqartoqarsinnaanngilaq. Apeqquteqaat pillugu oqallinnermi taamaalilluni inatsisartut oqaaseqaataat ataasiinnaq akuersissutigineqarsinnaavoq. Inatsisartut oqaaseqaateqarnissaannut siunnersuut ataaseq akuersissutigineqarpat, inatsisartut oqaaseqaatissaattut siunnersuutaajunnartut ataatsimiinnermik aqutsisumut nalunaarutigineqartut, sulili taasissutigineqanngitsut, atorunnaassapput. Apeqquteqaammik oqallisiginninnerup nalaani allatut ilusilimmik aalajangiisoqarsinnaanngilaq, takukkilli §§-it 50-miit 52-mut.”</p>
	<p><b>10.</b> § 38-imi <i>imm. 4</i>-p kingornanut immikkoortutut nutaatut ilanngunneqassapput:  <i>”Imm. 5.</i> Naalackersuisunut Inatsisartunullu ilaasortanit siunnersuutit Inatsisartut ukiuata naanerani inaarutaasumik akuersissutigineqarsimanngitsut atorunnaartarput, taamaattorli <i>imm. 6</i> takuuk. Tamanna aamma atuuppoq Inatsisartunut ilaasortanit apeqquteqaatinut, Inatsisartut ukiuata naanerani inaarutaasumik suliarineqarsimanngitsunut.  <i>Imm. 6.</i> § 33, <i>imm. 6</i>, nr. 1 naapertorlugu Nunatta Karsiata Naatsorsuutaasa</p>

	akuerineqarnissaannik siunnersuut imm. 5 apeqquataatinnagu Inatsisartut ukiuata naanerani atorunnaarneq ajorpoq.”
<p><b>§ 40.</b> Oqaluuserisassat, Inatsisartut oqaluuserisassaattut ilanngutitikkumasat, kingusinnerpaamik Inatsisartut ataatsimiinnissaata pineqartup aallartinnissaa sapaatip akunnerinik tallimanik sioqqullugu piumasaaqaatit naapertorlugit saqqummiunneqassapput, Inatsisartulluunniit Siulittaasuannut tunniunneqarlutik.</p>	<p><b>11.</b> § 40-mi <i>imm. 1</i> kingornanut immikkoortutut nutaatut ilanngunneqassaaq: ”<i>Imm. 2.</i> Imm. 1-imi piffissaliussaq § 36 naapertorlugu apeqquateqaatit nalunaarutigineqarnerannut atuutinngilaq.”</p>
<p><i>Imm. 3.</i> Ataatsimiinneq aallartereersimatillugu ataatsimiinnermi oqaluuserisassat tullerriaarnerat Inatsisartut allanngortissinnaavaat.</p> <p><i>Imm. 4.</i> Inatsisartut akuersiseqqaarnagit suliassat nutaat ataatsimiinnermi oqaluuserisassanut ilanngunneqarsinnaanngillat.</p>	<p><b>12.</b> § 43, <i>imm. 3</i> aamma <i>4</i>, ima oqaasertaqassapput: ”<i>Imm. 3.</i> Ataatsimiinneq aallartereeraangat ataatsimiinnermik aqutsisup pissutissaqarluni ataatsimiinnermi oqaluuserisassat tulleriinnerat allanngortissinnaavaa imaluunniit oqaluuserisassamik ullumi pineqartumi isumaqatigiinniarnerniit peersisinnaalluni.</p> <p><i>Imm. 4.</i> Ataatsimiinnermik aqutsisoq ataatsimiinnermi oqaluuserisassanut suliassanik nutaanik ilanngussisinnaanngilaq Inatsisartut akuersissuteqarsimatinnagit.”</p>
<p><b>§ 48.</b> Suleriaatsimut ilanngussami tulleriinnilersuineq nalunaarneqartoq malillugu oqallinneq ingerlanneqassaaq.</p>	<p><b>13.</b> § 48, <i>imm. 1</i> ima oqaasertaqassaaq: ”§ 48. Suleriaatsimut Ilanngussami 1-imi tulleriinnilersuineq nalunaarneqartoq malillugu isumaqatigiinniarnarit ingerlanneqartassapput. Ilanngussami allatut nalunaarsimasoqartinnagu partiip Inatsisartuni amerlanerpaanik ilaasortaataitaqartup oqaaseqartartua siulliulluni oqaaseqassaaq, tulliulluni oqaaseqassalluni partii amerlanerpaat tulliinik ilaasortaataitaqartoq il.il., partiit tamarmik oqaaseqartuisa oqaaseqarnissaasa tungaanut. Partiit marluk amerlaqatigiinnik ilaasortaataitaqartillugit Inatsisartunut qinersinnermi kingullermi partiip amerlanernik qinerneqartup oqaaseqartartua siulliulluni</p>

	oqaaseqassaaq.”
<i>Imm. 3. Inatsisartuni oqallinnermi suleriaatsimut ilanngussami oqaaseqarnermi piffissaliussatut nalunaarsukkat atuutissapput.</i>	<b>14. § 48, imm. 3-mi</b> ”ilanngussami” allanngortinneqassaaq ”Ilanngussami 1-imi”-nngortillugu: <i>Imm. 3. Inatsisartuni oqallinnermi suleriaatsimut Ilanngussami 1-imi oqaaseqarnermi piffissaliussatut nalunaarsukkat atuutissapput.</i>
	<b>15. § 55-ip</b> kingornanut qulequttatut nutaatut ilanngunneqassaaq: <i>”Nammineq atuuffiit inuussutissarsiutillu pillugit paasissutissat”</i>
	<b>16.</b> Qulequttap nutaap kingornanut ilanngunneqassaaq: <b>”§ 56.</b> Qanoq annertutigisumik qanorlu ilusilimmik Inatsisartunut ilaasortat namminneq atuuffitik inuussutissarsiutillu pillugit Inatsisartut atuuffinnik nalunaarsuviannut paasissutissiisarnissaannut malittarisassanik Suleriaatsimut Ataatsimiititaliaq aalajangersaassaaq. <i>Imm. 2. Inatsisartunut ilaasortat qinigaasinnaanermik akuerineqarnerata kingorna qaammat ataaseq qaangiutsinnagu Inatsisartut atuuffinnik nalunaarsuviannut paasissutissanik tunniussissapput. Paasissutissanik tunniussinermi immikkut immersuivissaq ilaasortat atussavaat.</i> <i>Imm. 3. Sinniisussat piffissamat aalajangersimanngitsumut Inatsisartunut ilaasortaq taarserlugu ilaasortanngortut Inatsisartunut ilaasortanngornermik kingorna ullut 30-it iluanni paasissutissanik tunniussissapput. Pisussaaffik tamanna aamma atuuppoq sinniisussanut piffissamat sivikinnerpaamik ullunut 30-inut Inatsisartunut ilaasortaq taarserlugu ilaasortanngorallartunut.</i> <i>Imm. 4. Inatsisartut atuuffinnik</i>

	<p>nalunaarsuiviat Inatsisartut nittartagaanni tamanit takuneqarsinnaassaaq.”</p> <p>Maannamut § 56-iusimasoq atorunnaarpoq.</p>
<p style="text-align: center;"><b>Kapitali 13</b> <i>Ilaasortatut tunuarneq, sulinnigiffeqarallarneq il.il.</i></p> <p>§ 56. Inatsisartunut ilaasortaq Inatsisartunit tunuarumalluni qinnuteqaateqarpat Inatsisartut aalajangissavaat qinnuteqaat akuerineqassanersoq. Inatsisartunut qinersinermi qinersinermik allattaavimmi sinniisussat allattorsimaffianni ilanngunneqarsimalluni sinniisussaq qinikkatut sulinniginnissaminik qinnuteqarpat qinnuteqaat akuerineqarsinnaanersoq Inatsisartut aalajangissavaat. Qinnuteqaat Inatsisartut ataatsimiinnerata avataatigut saqqummiunneqarpat Inatsisartut sinnerlugit Inatsisartut Siulittaasoqarfiata aalajangissavaa qinnuteqaat akuerineqassanersoq.</p> <p><i>Imm. 2.</i> Inatsisartunut ilaasortaq peqqiilliornerminik, naartunerminik erninerminilluunniit, inuussutissarsiuatiminik assigisaanilluunniit pingaarutilimmik pissuteqarluni Inatsisartunit sulinnigiffeqarallarumalluni qinnuteqarpat Inatsisartut Siulittaasoqarfiata aalajangissavaa qinnuteqaat akuerineqarsinnaanersoq.</p> <p><i>Imm. 3.</i> Inatsisartunut ilaasortaq Inatsisartut ataatsimiinneranni peqataasinnaanngikkallassaguni Inatsisartut Siulittaasuannut nalunaassaaq. Inatsisartut Siulittaasoqarfiata aalajangissavaa suut pissutissavittut naatsorsuunneqassanersut.</p> <p>§ 57. Naalakkersuisunut ilaasortaq Naalakkersuisunit tunuarneqarpat</p>	<p>17. <i>Kapitali 13</i> ima oqaasertaqassaaq:</p> <p style="text-align: center;"><b>”Kapitali 13</b> <i>Tunuarneq, sulinnigiffeqarneq il.il.</i></p> <p>§ 57. Naalakkersuisunut ilaasortaq Naalakkersuisunit tunuarneqarpat Inatsisartut aalajangissavaat qinnuteqaat</p>

Inatsisartut aalajangissavaat qinnuteqaat akuerineqarsinnaanersoq.

*Imm. 2.* Naalakkersuisunut ilaasortaq peqqiilliornini allamilluunniit pingaarutilimmik pissuteqartumik sulinnigiffeqarnissamik qinnuteqarpat Naalakkersuisut Siulittaasuata aalajangissavaa qinnuteqaat akuerineqarsinnaanersoq.

*Imm. 3.* Naalakkersuisunut ilaasortaq sulinnigiffeqarallarnissaminik akuerineqarpat imaluunniit Inatsisartut ataatsimiinneranni peqataasinnaanngikkallarpat Naalakkersuisut Siulittaasuata Inatsisartut Siulittaasuannut nalunaarutigissavaa taassuma suliassaqarfii kimit isumagineqarallassanersut.

**§ 58.** Inatsisartunut ilaasortaq oqartussaassusiagaappat, ilaasortaanerminut tunuarpat, toquppat, sulinnigiffeqarallarnissaminut akuerineqarpat imaluunniit pissutissaqavilluni ataatsimeeqataasinnaajunnaarpat sinniisussaa Inatsisartut ataatsimiinnerinut peqataajartoqqullugu ataatsimiigiaqquneqassaaq. Tamanna aamma pisassaaq Inatsisartunut ilaasortap qinigaasinnaanerminik annaasaqarneranik Inatsisartut aalajangiigaangata.

*Imm. 2.* Ilaasortaq ataatsimiinnermi ataatsimeeqataasinnaanngikkallartillugu sinniisussaq peqa-taajartoqqullugu

akuerineqarsinnaanersoq.

*Imm. 2.* Naalakkersuisunut ilaasortaq peqqiilliornini allamilluunniit pingaarutilimmik pissuteqartumik sulinnigiffeqarnissamik qinnuteqarpat Naalakkersuisut Siulittaasuata aalajangissavaa qinnuteqaat akuerineqarsinnaanersoq. Naalakkersuisut Siulittaasuata peqqiilliornini allamilluunniit pingaarutilimmik pissuteqartumik sulinnigiffeqarnissamik qinnuteqarpat Inatsisartut aalajangissavaat qinnuteqaat akuerineqarsinnaanersoq. Inatsisartut ataatsimiinnerata avataani qinnuteqartoqarpat Inatsisartut Siulittaasoqarfiata Inatsisartut sinnerlugit aalajangissavaa qinnuteqaat akuerineqarsinnaanersoq.

*Imm. 3.* Naalakkersuisunut ilaasortaq sulinnigiffeqarallarnissaminik akuerineqarpat imaluunniit Inatsisartut ataatsimiinneranni peqataasinnaanngikkallarpat Naalakkersuisut Siulittaasuata Inatsisartut Siulittaasuannut nalunaarutigissavaa taassuma suliassaqarfii kimit isumagineqarallassanersut.

**§ 58.** Inatsisartunit sulinnigiffeqarneq peqataasinnaanngikkallarnerlu kiisalu sinniisussamik ataatsimiigiaqqusisarneq pillugit Inatsisartut malittarisassaasut suleriaatsimut matumunnga Ilanngussami 2-mi aalajangersarneqarput.

*Imm. 2.* Inatsisartunut ilaasortaq Inatsisartunit tunuarumalluni qinnuteqaateqarpat Inatsisartut aalajangissavaat qinnuteqaat akuerineqassanersoq. Inatsisartunut qinersinermi qinersinermik allattaavimmi sinniisussat allattorsimaffianni ilanngunneqarsimalluni sinniisussaq qinikkatut sulinniginnissaminik qinnuteqarpat qinnuteqaat akuerineqarsinnaanersoq

<p>ataatsimiigiaqquneqassanersoq Inatsisartut Siulittaasoqarfiannit aalajangiiffigineqartassaaq. Sinniisussap qinigaasinnaassuseqarnera § 7, imm. 1, nr. 2 naapertorlugu Qinigaanerup Misilinneqarnissaanut Ataatsimiititaliamit misissorneqartassaaq, tamatumalu kingorna taanna Inatsisartunut inassuteqaateqartassaaq. Ilaasortaq sulinnigiffeqarallareersimalluni imaluunniit pissutissaqavilluni ataatsimeeqataaangikkallareerluni Inatsisartunut ilaasortatut sulileqqippat sinniisussaa tunuassaaq.</p>	<p>Inatsisartut aalajangissavaat. Qinnuteqaat Inatsisartut ataatsimiinnerata avataatigut saqqummiunneqarpat Inatsisartut sinnerlugit Inatsisartut Siulittaasoqarfiata aalajangissavaa qinnuteqaat akuerineqarsinnaanersoq.”</p>
	<p><b>18.</b> <i>Inatsisartut suleriaasiannut Ilanngussaq 1</i>, maannamut <i>Oqaaseqarnermi piffissaliussat pillugit ilanngussaq</i>-mut taartaasoq, allannguutissatut siunnersuummut matumunnga Ilanngussatut 1-itut oqaasertalerneqassaaq.</p>
	<p><b>19.</b> <i>Inatsisartut suleriaasiannut Ilanngussaq 2</i>, allannguutissatut siunnersuummut matumunnga Ilanngussatut 2-tut oqaasertalerneqassaaq.</p>
	<p style="text-align: center;"><b>§ 2</b></p> <p>Allannguutit ulloq 1. juli 2015 atuutilissapput.</p>

### 3. Pisortanut aningaasatigut allaffissornikkullu kingunerisassai

Siunnersuutip pisortanut annerusumik aningaasatigut allaffissornikkullu kinguneqarnissaa naatsorsuutigineqanngilaq, ullumikkut suleriaasiusup immikkoortuni pingaarutilinni tamani ingerlatiinnarneqarnissaa naatsorsuutigineqarmat. Tamanna atuuppoq sulinnigiffeqarnissamik akuerineqartarneq, atuuffinnik nalunaarsuiviup aqunneqarnera il.il. pillugit malittarisassat aggersut eqqarsaatigalugit.

Siunnersuutit ataasiakkaat siunertaraat aalajangiiffigisassatut siunnersuutit apeqquteqaatillu tunngavigalugit oqallinnerit amerlassusiisa naammassineqarsinnaanerusumik amerlassuseqalersillugit killeqarnissaat, ilaatigut ataatsimiititaliat isumaliutissiissuteqarnissaannut § 17-imi pisussaaffiata atorunnaarsinneqarneratigut, taamatullu aamma Inatsisartut ukiuata naanerani siunnersuutit naammassillugit

suliarineqarsimangitsut atorunnaartarnissaannik § 38, imm. 4-mi siunnersuuteqarnikkut. Siunnersuutit taakkua naatsorsuutigineqarpoq killilimmik Inatsisartuni Naalakkersuisunilu taakkulu allaffeqarfiini nukissanik allanut atugassanngortitsisinnaassasoq. Tamatumani sipaaruteqartoqarsinnaanera nalornarpoq, aalajangiiffigisassatut siunnersuutit il.il. saqqummiunneqarsinnaasut killilerneqanngimmata. Siulittaasoqarfik taamaattumik isumaqanngilaq sipaaruteqartoqarsinnaanera tunngaviusinnaanngitsoq Naalakkersuisunut Inatsisartunullu aningaasaliissutit annikillisinneqarnissaannut, naatsorsuutigineqarporlu aalangiiffigisassatut siunnersuutit il.il. ikilinerat pissutigalugu nukissatigut sipaarneqarsinnaasut siunnersuutit allat pitsaassusiisa qularnaarnerinut atorneqarsinnaasut.

Ataatsimiititalianut ilaasortat tallimanut killilerneqarnerat ataatsimiititalianut ukununnga sunniuteqassaaq:

Ilaqutariinnermut Peqqissutsimullu Ataatsimiititaliaq  
Aalisarnermut, Piniarnermut Nunalerinermullu Ataatsimiititaliaq  
Aatsitassanut Ataatsimiititaliaq  
Aningaasaqarnermut Akileraartarnermullu Ataatsimiititaliaq.

Inatsisartut atuuffinnik nalunaarsuiviannut paasissutissiisussaatitaanerup malinneqannginnerata malitsigisaanik ilaasortamut ataatsimut tapiissutit killilerneqarnissaannut naalakkersuinikkut sulinermut tapiissutit pillugit inatsisip allanngortinneqarneranik inatsisissatut siunnersuutip akuersissutigineqarnissaa apeqputaavoq. Inatsisissatut siunnersuummut tassunga nassuiaatit innersuussutigineqarput. Aallaavittut tassuuna sipaaruteqartoqarnissaa naatsorsuutigineqanngilaq.

4. Inuussutissarsiornermut aningaasatigut allaffissornikkullu kingunerisassai  
Siunnersuut inuussutissarsiornermut aningaasatigut allaffissornikkullu kinguneqassanngilaq.

5. Avatangiisinut, pinngortitamut innuttaasullu peqqissusiannut kingunerisassai  
Siunnersuut avatangiisinut, pinngortitamut innuttaasullu peqqissusiannut kinguneqassanngilaq.

6. Innuttaasunut kingunerisassat  
Siunnersuut innuttaasunut kinguneqassanngilaq.

7. Allatigut kingunerisassat pingaarutilit  
Siunnersuutip allatigut pingaarutilinnik kinguneqarnissaa naatsorsuutigineqanngilaq.

8. Tusarniaaneq  
Siunnersuut tamanut ammasumik tusarniaatigineqarsimangilaq, innuttaasunut inuussutissarsiornermulluunniit sunniuteqartussaannngimmat.



Oqaasileriffik Siulittaasoqarfiup kissaateqarneratigut 7. maj qarasaasiakkut allakkatigut suleriaatsimi § 19-ip allangortinniarneqarnera pillugu oqaaseqartinneqarpoq. Tassani siunnersuutigineqarpoq Naalakkersuisumik isumasiuineq taarsarlugu oqaatsit siunnersiueq aamma ilisimatitsiffiusumik ataatsimiinneq immikkoortillugillu atorneqalernissaat. Oqaasileriffiup siunnersuina naapertorlugu taaguutit naleqqussarneqarput.

## **Siunnersuummi aalajangersakkanut ataasiakkaanut nassuiaatit**

### *Til § 1*

Nr. 1-imut

Suleriaatsimi § 1, imm. 2-p, Qinigaanerup Misilinneqarnissaanut Ataatsimiititaliamik pilersitsinissamut tunngasup, nutaamik oqaasertalerneqarnissaa siunnersuutigineqarpoq. Ataatsimiititaliap suliasai maannamutut suleriaatsimi § 1, imm. 3-4-mi § 2-milu, kiisalu Inatsisartut Naalakkersuisullu pillugit Inatsisartut inatsisaanni §§-ini 7-imi 25-milu allaaserineqarsimassapput. Ataatsimiititaliap suliasaasa allangortinneqarnissaannik siunnersuuteqartoqanngilaq. Allanguutissatut siunnersuutigineqartumut pissutaasut itisilernissaannut nalinginnaasumik nassuiaatini imm. 2.1 innersuussutigineqarpoq.

Imm. 2-tut siunnersuutigineqartumi oqaaseqatigiinni siullerni aalajangersarneqarpoq § 1 naapertorlugu nutaamik qinersisoqareernerata kingorna qinigaanerup misilinneqarnissaanut ataatsimiititaliaagallartumik pilersitsisoqassasoq. Ataatsimiititaliaq ”ataatsimiititaliaagallartuuvoq” Inatsisartut kingusinnerusukkut inissiternerminnut atatillugu inaarutaasumik Qinigaanerup Misilinneqarnissaanut Ataatsimiititaliamik pilersitsisussaammata.

Maannamutut Inatsisartunut sivilunerpaamik ilaasortaasimasoq Inatsisartut sinnerlugit ataatsimiititaliamik pilersitsisussaavoq. Tamanna pisariaqarpoq qinigaanerup misilinneqarnissaa pitinnagu Inatsisartut aalajangiisinnaassuseqanngimmata. Imm. 1-ip taamatut oqaasertalerneqarneratigut erseqqissarneqarpoq sivilunerpaamik ilaasortaasimasoq ataatsimiititaliap pilersinneqarnerani piginnaatitaasoq Inatsisartut sinnerlugit iliuseqarnissaminut, tamannalu massakkumut oqaasertaasimasumik erseqqissaanerulluni. Taanna malillugu Inatsisartut ataatsimiititaliamik pilersitsisussaasimapput, erseranilu sivilunerpaamik ilaasortaasimasoq tassaasoq tamatumingga ulluinnarni timitaliisussaasoq.

Taaguut sivisunerpaamik ilaasortaasimasoo § 1, imm. 1, oqaaseqatigiit aappaanni, aamma § 1, imm. 1, oqaaseqatigiit pingajuanni innersuussutigineqartumi, nassuiarneqarpoq. Taaguut inatsisartoqarnermi periaatsini ilisimaneqarluareerpoq.

Sivisunerpaamik ilaasortaasimasup ataatsimiititaliaq pilersissavaa, qinersinerup pisortatigoortumik inernera malillugu paasissutissiissutigineqartut, Inatsisartunut ilaasortat akornannit. Taamaalilluni ilaasortanik pisortatigoortumik qinersinerup inernera kingulleq malillugu Inatsisartunut qinigaasimangitsunik toqqaasoqarsinnaanngilaq.

Imm. 2, oqaaseqatigiit aappaat malillugu sivisunerpaamik ilaasortaasimasoo maannamutut qinigaanerup misilinneqarnissaanut ataatsimiititaliaagallartumut pinngitsoorani ilaasortaallunilu siulittaasuusaaq. Aalajangersakkami tassani eqqarsaatigineqarpoq inatsisartuni sulinermik misilittagaqarneq partiimut sumut atanermit pingaarnerusutut isigineqarmat, tassami ataatsimiititaliap sulinermini naalackersuinikkut illuinnaasiunnginnisaaq anguniartussaammagu.

Qinigaanerup misilinneqarnissaanut ataatsimiititaliaagallartumut ilaasortat allat sisamat sivisunerpaamik ilaasortaasimasoo toqqaarneqassapput ”Inatsisartuni naalackersuinikkut suliniaqatigiiffinit sapinngisamik tamatigoornerpaamik sinniisuutitaqarnissap qularnaarneqarnissaa siunertaralugu”.

Taamatut oqaasertaliinikkut erseqqissarneqarpoq sivisunerpaamik ilaasortaasimasoo ukiorpasuarini suleriaasiusimasoo naapertorlugu ataatsimiititaliaq katitertussaammagu Inatsisartunut ilaasortat amerlanerpaat ataatsimiititaliami sinniisuutitaqartillugit. Taamatut toqqaasoqarnermi nalinginnaasumik suleriaasiusooq naapertorlugu partiit il.il. pineqartut siulittaasui, siulittaasooq qirnerneqarsimappat, inissanik neqeroorfigineqartarput, kisiannili siulittaasut taakku naatsorsuutigisinnaavaat ataqqineqassasooq partiimi ilaasortaatariligaasa akornannit allamik toqqaanissaaq kissaatigineqarpat.

Assersuutit:

Inatsisartuni partiit, kattusseqatigiit kisimiillutillu qinikkat immikkoortut tallimat sinniisuutitaqarpata, immikkoortunit taakkunanga tallimanit suleqatigiit sisamat, sivisunerpaamik ilaasortaasimasup ilaasortaaffiginngisai, sinniisissaminnik toqqaassapput.

Inatsisartuni partiit, kattusseqatigiit kisimiillutillu qinikkat immikkoortut arfinillit sinniisuutitaqarpata, immikkoortunit taakkunanga anginernit sisamat, sivisunerpaamik ilaasortaasimasup ilaasortaaffiginngisai, sinniisissaminnik toqqaassapput. Immikkoortut ilaasortaataritakinnerit amerlaqatigiinnik ilaasortaataritaqarpata, sivisunerpaamik ilaasortasimasup nalinginnaasumik paasiniaqqaartassavaa immikkoortut ilaasortaataritakinnerit taakku isumaqatigiissinnaanersut taakku akornannit kina toqqaarneqassanersooq.

Isumaqatigiittoqanngippat sivisunerpaamik ilaasortaasimasooq najoqqutassat illuinnaasiunngitsut malillugit toqqaassaaq, tassa nalinginnaasumik ilaasortaaqatigiit (gruppit) siulittaasuini utoqqaanerpaaq pillugu § 1, imm. 1 malillugu najoqqutassat tunngavigalugit.

Inatsisartuni partiit, kattusseqatigiit kisimiillutillu qinikkat immikkoortut sisamat taamaallaat sinniisuutitaqarpata, immikkoortunit taakkunanga pingasut, sivisunerpaamik ilaasortaasimasup ilaasortaaffiginngisai, toqqaassapput ilaasortarlu kingulleq Inatsisartuni partiit annersaanit il.il. toqqaarneqassalluni.

Qulaanili najoqqutassat sanioqqunneqarnissaat taamaattoq pisariaqalersinnaavoq, sivisunerpaamik ilaasortaasimasup – parteeqarnikkut naalakkersuinikkut soqutigisat akimorlugit - nalilerpagu Inatsisartunut ilaasortaq Qinigaanerup misilinneqarnissaanut ataatsimiititaliaagallartumut ilaasortaasinnaanngitsooq, ilaasortaq erseqqilluinnartumik ataatsimiititaliap sulineranut atatillugu peqataasinnaanngitsutut isigineqartariaqarpat. Taamaattoqarpat sivisunerpaamik ilaasortaasimasooq pineqartup naalakkersuinikkut suleqatigiiffianeersumik ilaasortamik allamik toqqaasinnaavoq, nalinginnaasumik immikkoortut taakku qanimut isumasioqatigereerlugit.

Aalajangersakkami oqaaseqatigiit kingulliit, allannguuteqanngitsut, malillugit qinigaanerup misilinneqarnissaanut ataatsimiititaliaagallartumut ilaasortanut sinniisussanik toqqaasoqarneq ajorpoq, misilittakkat tunngavigalugit ataatsimiititaliaagallartup piffissami sivikitsuinnarmi atanissaa naapertorlugu tamanna pisariaqarneq ajormat.

Nr. 2-mut

Siunnersuummi pineqarpoq Suleriaatsimut Ataatsimiititaliap suliassai allaaseralugit § 4-mut, imm. 9-mik nutaamik ilanngussisoqarniarmat, suleriaatsimi malittarisassat maannamullu suleriaasiusimasooq malillugit taakku isumagineqarnerat naapertorlugu. Allannguutissatut siunnersuutigineqartumut tunngaviusut itisilerneqarnerannut nalinginnaasumik nassuiaatini imm. 2.2-mi takuneqarsinnaapput.

Suleriaatsimut atuuttumut sanilliullugu allanngortitsisoqarnissaa anguniarneqarsimannngilaq, taamaallaalli erseqqissaasoqarluni, minnerunngitsumik ataatsimiititaliap taassuma Inatsisartut Siulittaasoqarfialatu akornanni suliassat agguataarneqarnerat eqqarsaatigalugu. Taamaattorli aalajangersakkami piareersimaffigineqarpoq suliassaq nutaaq, § 56-imut nutaamut siunnersuut naapertorlugu qanoq annertutigisumik Inatsisartunut ilaasortat namminneq atuuffitik inuussutissarsiutitillu pillugu paasissutissiisarnissamut malittarisassiortartussatut, siunnersuutigineqarpat ataatsimiititaliamut tunniunneqassasoq.

Suleriaatsimut Ataatsimiititaliap ataatsimiititaliap taaguutaa naapertorlugu Inatsisartut Suleriaasiat immikkut suliassaqarfigaa. Imm. 9 oqaaseqatigiinnut siullernut siunnersuut

innersuussutigineqarpoq, tassani aalajangersarneqarluni Suleriaatsimut Ataatsimiititaliap maannamut suleriaasiusoq naapertorlugu Siulittaasoqarfimmit Suleriaatsimut Ataatsimiititaliamut siunnersuutit suliarisassagai, tassunga ilanngullugit suleriaatsimi § 32 naapertorlugu suleriaatsimut allannguutissatut siunnersuutit.

Oqaaseqatigiinni siullerni suliassat suleriaatsimi § 60, imm. 1 aamma 2 malillugit Suleriaatsimut Ataatsimiititaliamut suliassaataareersut innersuussutigineqarput.

§ 60, imm. 1 malillugu Siulittaasoqarfiup Inatsisartunut missingersuutit suliarisassavai tamatumunngalu atatillugu Suleriaatsimut Ataatsimiititaliamut, missingersuutinut siunnersuutinik akuersissuteqartussamut aningaasat ukiuannut aggersumut aningaasanut inatsissatut siunnersuutip suliarineqarneranut atatillugu Naalakkersuisut Siulittaasuannut nassiussisussamut, inassuteqarluni.

§ 60, imm. 2 malillugu Siulittaasoqarfiup taamatuttaaq Inatsisartut ilassutitut aningaasaliissutinut inatsisissatut siunnersuut suliarisassavaa Suleriaatsimullu Ataatsimiititaliamut inassuteqaateqasrluni. Tamatumani aamma naatsorsuutigineqarpoq Suleriaatsimut Ataatsimiititaliap siunnersuutit Siulittaasoqarfimmit inassutigineqartut oqaluuseralugillu akuerisassagai.

§ 4, imm. 9, oqaaseqatigiit aappaanni siunnersuutigineqarpoq erseqqissarneqassasoq Suleriaatsimut Ataatsimiititaliaq ataatsimiititaliap suliassaqarfii pillugit aalajangiisassasoq, tamatumani nalornissuteqartoqartillugu. Tamanna minnerunngitsumik pisinnaavoq Inatsisartut ataatsimiinnerannut siunnersuut ataatsimiititaliani arlalinni suliarineqartussannagortinneqarsinnaassapput, kisiannili ataatsimiititaliaq ataasiinnaq isumaliutissiissuteqarsinnaalluni, pisariaqarpat ataatsimiititaliat allat tusarniareerlugit. Taamaattorli malittarisassat atuuttut aalajangersimasumilluunniit suleriaatsit malillugit takuneqarsinnaavoq suliassaqarfiit suut Inatsisartut ataatsimiititaliaasa assigiinngitsut isumagisassarineraat, imaluunniit tamanna § 7, § 8, imm.1 aamma § 23 naapertorlugit ataatsimiititaliat pilersinneqarnerinut atatillugu takuneqarsinnaassalluni.

Suleriaatsimut Ataatsimiititaliaq taamaallaat nalorngissuteqartoqartillugu ataatsimiititaliat suliassaqarfii pillugit aalajangiisartussaammat, Inatsisartut Siulittaasoqarfiannit taamatut nalorngissuteqarnerit kisimik ataatsimiititaliamut saqqummiunneqartassapput. Suleriaatsimi § 14 naapertorlugu siunnersuutip ataatsimiititaliamut sorlermut innersuunneqarnissaanik Inatsisartuni aalajangernerit Suleriaatsimut Ataatsimiititaliap allanngortissinnaassanngilai. Tamatumunnga pissutaavoq Inatsisartut aalajangernerit ataatsimiititaliap aalajangernerinit salliusussaammata, Inatsisartut aalajangiisimanerat nalornissutigineqaqqunagu. Kiisalu aamma inatsit Suleriaasissarluunniit malillugit ataatsimiititaliat suliassaqarfiisa

agguataarneqarnerat ataatsimiititaliap allanngortissinnaanngilaa, ataatsimiititaliali tassa nalornngissutaajunnartut isummerfigisinnaassallugit.

Nr. 3-mut

§ 9, imm. 1-ip iluarsineqarnissaa siunnersuutigineqarpoq, Inatsisartut siusinnerusukkut aaqqissuussinnermut uteqqissallutik, taamaalilluni Inatsisartut Ataatsimiititaliaat tamatigut tallimanik ilaasortalerlugit pilersinneqartussanngorlugit. Taamaalilluni ataatsimiititaliat arfineq-marluk tikillugit ilaasortaqaarsinnaanerannik maannamut periarfissaasimasooq atorunnaarsinneqassaaq, periarfissaq taanna 2011-mi suleriaatsimut ilanngunneqarnermi kingorna naammaginartumik ingerlasimannngimmat. Itisiliinissamut nalinginnaasumik nassuiaatini imm. 2.3 innersuussutigineqarpoq.

Siunnersuutigineqarpoq allannguut timitalerneqassasooq suleriaatsimi § 9, imm. 1-imi oqaaseqatigiit siulliit attatiinnarneqarneratigut, oqaaseqatigiilli aappaat atorunnaarluni. Taamaalilluni aalajangersagaq 2011-imi suleriaatsimik allanngortitsineq eqqartorneqartoq sioqqullugu imarisamisut imaqaqqilissaaq.

Naatsorsuutigineqarpoq ataatsimiititaliat arfineq-marlunnik inuttallit atuuttut arfineq-marlunnik ilaasortaqaannassasut, ataatsimiititaliat pineqartut pilersinneqaqqinnissaasa/nutaamik inissititeqqinnissaasa tungaanut. Naatsorsuutigalugu siunnersuut manna 2015-imi upernaakkut ataatsimiinnermi akuersissutigineqassasooq, naatsorsuutigineqarpoq ataatsimiititaliat attorneqartut tamarmik 2015-imi ukiakkut ataatsimiinnerup aallartinnerani nutaamik inissititereersimassasut.

Allannguutissatut siunnersuutigineqartoq Suleriaatsimut Ataatsimiititaliamut ilaasortat amerlassusiinut sunniteqassanngilaq, taanna suleriaatsimi § 4, imm. 2-mi aalajangersagaq naapertorlugu suli katiterneqartartussaammat.

Nr. 4-mut

§ 10, imm. 2 siunnersuutigineqarpoq annertusineqassasooq Siulittaasoqarfiup pisuni ataasiakkaani Inatsisartut Allattoqarfiat piginnaatissinnaallugu ataatsimiititaliat sulineranni ilaasortap namminerisaminik sinniisoqarsinnaanissaanik partiit teknikikkulluunniit suleqatigiit qinnuteqaataasa akuerineqarnissaata aalajangiiviginissaanut. Taamaalilluni aalajangersagaq suleriaatsimut atuuttumut naapertuuttunngortinneqassaaq, nalinginnaasumik nassuiaatini imm. 2.4 naapertorlugu ataatsimiititaliat ataatsimiinnerinut ilaanneeriarluni nammineq sinniisoqarsinnaanermik apeqqut qaqutigunnaq Siulittaasoqarfimmu saqqummiunneqartarluni.

Aalajangersagaq oqaasertamigut killiliisuvoq, tassa allattoqarfik taamaallaat piginnaatinneqarmat ataatsimiititaliat sulineranni nammineq sinniisoqarnissamik partiit

teknikkulluunniit suleqatigiit qinnuteqaataanik akuersisinnaanerminut. Allattoqarfik tunngavissaqarsorinngippat qinnuteqaatip tamakkiisumik akuerinissaanut, suliassaq Siulittaasoqarfimmut saqqummiunneqassaaq.

Piginnaatitsissut taamatutaaq killilerneqarsimavoq ”pusini ataasiakkaani” sinniiseqarnissamik kissaateqarnernut. Sinniiseqarnissamik pisariaqartitsineq ataavarnerusut isikkoqarpat aalajangersimasumillu sinniisussaq ataatsimiinnerni ataasiakkaaniinnangitsoq piffissamiluunniit sivikinnerusumi peqataasinnaassanngippat suliassaq Siulittaasoqarfimmut saqqummiunneqassaaq.

Nr. 5-imut

§ 14-imut ilassutissatut siunnersuutigineqartumi aalajangersarneqarpoq erseqqissarneqarlunilu Inatsisartut aamma maannamut inatsisitut atuuttutut naatsorsuutigisimasaa. Siulittaasoqarfiup taamaattorli aamma pissusissamisoortutut isigivaa, inatsisitigut pissutsit aamma suleriaatsimi erseqqissarneqarpata siusinnissami nalornissutaajunnaartut pinngitsoortinniarlugit. Itisiliinisamut nalinginnaasumik nassuiaatini imm. 2.5 innersuussutigineqarpoq.

Aalajangersakkami oqaaseqatigiinni siullermi aalajangersarneqarpoq Naalakkersuisut ataatsimiititaliat apeqqutit allakkatigut akineqarnissaannik kissaateqarnerat itigartissinnaanngikkaat.

Oqaaseqatigiit aappaanni erseqqissarneqarpoq Naalakkersuisut ataatsimiititaliat paasitinneqarsinnaanerat killilersinnaagaa, ataatsimiititaliap taakkuninnga paasisaqarusunnera pisortat namminersortulluunniit soqutigisaannut pingaarutilinnut tunulluunneqartariaqarpat. Aalajangersakkakut Naalakkersuisut periarfissinneqanngillat akissuteqartussaataitanerminnik naammassinninnginnissamut, kisiannili tamanna pingaaruteqarluni qanoq sukumiitigisunik Naalakkersuisut akissuteqarsinnaanersut, pisortat namminersortulluunniit sakkortuumik soqutigisaat pisariaqartitsigaangata Inatsisartunut Ataatsimiititaliaannut paasissutissanik uninngatitsinissamut.

Naalakkersuisut pisuni taamaattuni pisussaaffeqarput oqimaalutaassallutik, illuatungaani ataatsimiititaliap suliassaqarfiinut pingaarulinnut paasisaqarnissamut ataatsimiititaliap soqutiginninnerata illuatungaani pisortat namminersortulluunniit soqutigisaasa Naalakkersuisunit isumaqarfigineqartut ulorianartorsiortinneqarsinnaasutut paasissutissat ataatsimiititaliamut ingerlateqqinneqarpat akornanni. Oqimaalutaaneq paasissutissat ataasiakkaat ataatsimiititaliamut allakkatigut akissummi uninngatinneqartussatut kissaatigineqartut tamaasa eqqarsaatigalugit pissaaq.

Oqimaalutaanermi tamatumani Naalakkersuisut inerniliuppassuk pisortat namminersortulluunniit soqutigisaat paasissutissani ataatsimiititaliap soqutigisaanit

sakkortunerungaartut, paasissutissaq pineqartoq Naalakkersuisut uninngatissinnaavaat. Tamatuma akerlianik Naalakkersuisut paasissutissamik uninngatitsisinnaanngillat, pisortat namminersortulluunniit soqutigisaat annikitsuinnarmik ataatsimiititaliap soqutigisaanit annertunerusutut nalilerneqarpata. Tamatuma malitsigisaanik Naalakkersuisut pisussaaffeqarsinnaapput ataatsimiititaliamut paasissutissiinissaminnut, naak pisortat namminersortulluunniit soqutigisaat paasissutissami ataatsimiititaliap soqutigisaanit annertunerugaluartut, kisiannili ima annertutiginnngitsumik ”annertunerungaartutut” oqaatigineqarsinnaanatik.

Paasitineqarsinnaatitaaneq pillugu inatsimmi § 13, imm. 1, nr. 1-4, soqutigisat tamatumunnga atatillugu Naalakkersuisunit isumagineqarsinnaasut eqqarsaatigalugit isigineqarsinnaavoq.

Oqaaseqatigiit pingajuanni aalajangersarneqarpoq ataatsimiititaliap paasissutissanik pissarsisinnaanerata killilerneqarnissaanik aalajangerneq tamatigut allakkatigut tunngavilersorneqartassasoq. Tamanna siullermik isumaqarpoq Naalakkersuisut tamatigut nammineq piumassutsiminnik ataatsimiititaliamut malugeqqusassagaat oqaaseqatigiit aappaat tunngavigalugu aalajangersimasut ataatsimiititaliamut tunniunniarneqanngitsut. Tamatuma kingorna Naalakkersuisut aalajangerkertik allakkatigut tunngavilersussavaat, ataatsimiititaliamut takuneqarsinnaasunngorlugu isiginiagassat suut Naalakkersuisut oqimaalutaanerannut aalajangernerannullu tunngaviusimanersut.

Aalajangersagaq tunngavimmigut paasissutissinneqarsinnaatitaaneq pillugu inatsimmut naapertuuppoq, taannami malillugu paasitineqarnissamik qinnuteqaatit itigartinneqarnerat sukumiinerusumik tunngavilersorneqartussaammat. Suliassaqarfimmi tamatumani misilittagarineqarpoq sukumiisorujussuarnik tunngavilersuisoqarsinnaasoq, isertuussinissap isiginiarneqarnissaa maangaannartinngikkaluarlugu.

Maluginiartariaqarpoq oqaaseqatigiit pingajuat malillugu eqqortumik tunngavilersuineq Inatsisartunut ilaasortat akisussaassuseqarnerat pillugu inatsisiliornermi malittarisassat malillugit tunngaviusinnaanngimmat Naalakkersuisunut ilaasortat inatsisitigut akisussaatinniarneqarsinnaaneranut, kisiannili Inatsisartut namminneq aalajangersinnaammassuk pisoq naalakkersuinikkut malitseqartinneqassanersoq, Naalakkersuisut paasissutissanik uninngatitsisimanerat malitseqassagaluarpat Naalakkersuisunut taakkunungaluunniit ilaasortanut ataasiakkaanut tatiginnikkunnaarnermik.

Nr. 6-imut

Allannguutissatut siunnersuutip malitsigissavaa § 17, imm. 1, oqaaseqatigiit aappaanni aalajangersagaq Inatsisartut suleriaasiata 1999-imili allanngortinneqarneranit atuussimasup

atorunnaarsinneqarnera. Taanna malillugu ataatsimiititaliat pisussaaffeqaralarput siunnersuut ataatsimiititaliamut innersuunneqartut tamaasa pillugit isumaliutissiissusiornissamut.

Oqaaseqatigiit aappaata atorunnaarsinneqarnissaanik siunnersuutikkut Inatsisartut ataatsimiititaliaat periarfissaqaqqilissapput siunnersuutit, Inatsisartut siullermeerinninneranni ersereersut naalakkersuinikkut amerlanerussuteqarfiusinnaanngitsutut, tunulliussinnaalernissaannut. Siunnersuutit taamaattut tamatuma kingorna ”ataatsimiititaliami ipisinneqarsinnaalissapput”, tamatumalu malitsigissallugu isumaliutissiissusiornissaagaluup Inatsisartuni siunnersuutip suliarineqaqqinnissaanut piumasaqaataasup, ataatsimiititaliap aalajangernera malillugu pinngitsoortinneqarneranik. Taamaalilluni siunnersuutit Inatsisartuni suliarineqaqqinnissamut angussinnaassanngilaq naggataatigullu atorunnaarluni.

Siunnersuut suleriaatsimi § 38, imm. 5-ip allanngortinneqarnissaanut siunnersuummut atatillugu isigineqassaaq. Tassuuna qularnaarneqarpoq siunnersuutit Inatsisartut ukiuata naanerani inaarutaasumik akuerineqarsimanngitsut atorunnaarnerinik. Tassuuna qularnaarneqassaaq siunnersuutit naalakkersuinikkut akuerineqarnissaminnik ilimanaateqanngitsut ataatsimiititaliami ipisinneqarnera, kingusinnerukkut nutaamik isummerfigisariaarullutik.

Aalajangersakkap tamatuma siunertaraa ilaasortat siunnersuutaasa amerliartuinnavissut Inatsisartuni Naalakkersuisunilu taakku allaffeqarfii il.il. nukissanik annertunerujartuinnartumik malitseqartut killilersimaarneqarnissaat. Itisiliinissamut nalinginnaasumik nassuiaatini imm. 2.6 innersuussutigineqarpoq.

Maluginiaqquneqarpoq siunnersuutikkut Inatsisartut ataatsimiititaliaat pisussaaffiigaanngimmata siunnersuutit Inatsisartunit ataatsimiititaliamut innersuunneqartut isummerfiginissaannut. Siunnersuutilli pineqartut eqqarsaatigalugit suliarinninneq pisariillisarujussuakkatut pisinnaavoq, ataatsimiititaliap inerniliussinnaammagu siunnersuutip naalakkersuinikkut amerlanerussuteqarfiumissaa naatsorsuutigineqarsinnaanngitsoq, taamaattumillu tamanna tunngavigalugu isumaliutissiissuteqartoqarnianngitsoq.

Ataatsimiinnernik pilersarusiorneq eqqarsaatigalugu naatsorsuutigineqarpoq ataatsimiititaliat Siulittaasoqarfik ilisimatittassagaat ataatsimiititaliaq aalajangerpat isumaliutissiissuteqartoqassanngitsoq. Siulittaasoqarfiup nammineq piumassutsiminik tamanna pillugu apeqquteqaateqarsinnaavoq, tamatumunngalu atatillugu ataatsimiititalianut kaammattuutigalugu ilisimatitsissuteqaqqullugu siunnersuutit innersuunneqarsimasut pillugit isumaliutissiissuteqarnissaq naatsorsuutigineqarsinnaanersaq.



Nr. 7-imut

§ 19 siunnersuutigineqarpoq ”isumasiuineq” taaneqarfimmini tamani ”siunersiuinermik ilisimatitsiviusumillu ataatsimiinnermik” taarserneqassasoq. Allanguutissatut siunnersuummut tassunga tunuliaqutaasut pillugit nalinginanasumik nassuiaatini imm. 2.7 innersuussutigineqassaaq.

Allanguutip siunertaraa aalajangersakkap inatsisartoqarnermi suleriaatsimut naleqqussarneqarnissaa, taaguut ”siunersiuineq” pisuni ilungersunarnerusuni atorneqartassalluni, ataatsimiititaliaq kissaateqaraangat iliuutsini il.il. pillugit Naalakkersuisunut ilaasortaq nassuiaateqassasoq. Taaguut ”ilisimatitsiffiusumik ataatsimiinneq” akerlianik atorneqartassaaq paasissutissanik paarlaasseqatigiinneq ataatsimiinnermi pingaernerussasoq.

Aalajangersakkap oqaasertalerneqarnera allanngoraluartoq inatsisilerineq eqqarsaatigalugu siunersiuineq ilisimatitsiffiusumilluunniit ataatsimiinneq assigiilluinnassapput, imm. 4-milu oqaatsip ”ataatsimiinneq”-up atorneqarnerani pineqartut, tassa siunersiuineq ilisimatitsiffiusumillu ataatsimiinneq, tamarmik ataatsimut pineqarlutik. Siunersiuinermut ilisimatitsiffiusumillu ataatsimiinnermut ataatsimut atugassarititaasut ilaatigut takussutissartaraat Naalakkersuisunut ilaasortat ataatsimiinnermi taaneqartuni tamani assigiimmik pisussaaffeqaarmata eqqortunik, tamakkiisunik ilumoortunillu paasissutissiinissaminut, soorlu aamma Naalakkersuisunut ilaasortaq ataatsimiinnermini pineqartuni atorfilittami peqataasut oqaaserisaannut akisussaasuusoq.

Taamaattumik allanguut pingaartumik pingaaruteqarpoq ataatsimiititaliap suleriaaseq naapertorlugu Naalakkersuisunut ilaasortamik ataatsimiigiaqqusinertik oqaasertalersinnaammassuyk ataatsimiinnerup siunertaanik ersersitsisumik. Suleriaaseq tamanna ullumi malinneqareerpoq, suleriaatsimilu isiginiareneqarsimanani § 19 naapertorlugu ataatsimeeriaatsit marluk ineriartorsimmata.

Ataatsimiigiaqqusissutip oqaasertalerneqarenera apeqqutaatinnagu suli imaattussaassaaq ilisimatitsiffiusumik ataatsimiinneq ilungersunarinsinnaammata, ataatsimiititaliaq isumaqarpat pissutissaqalersoq Naalakkersuisunut ilaasortap sukumiinerusumik nassuiaateqarnissaanut. Pissutsit aamma akerlerluinnaanik ingerlasinnaapput siunersiuineq akaareqatigiiffiulluinnartumik ingerlanneqarluni, ataatsimiititaliap paasissutissanik pissarsinissani annerusumik soqutigippagu akissuteqaatigineqartullu iluarisimaarlugit.

Allatut oqaatigalugu ataatsimiititaliaq oqaatsinit ataatsimiigiaqqusissummi atorneqartunit sunnguamilluunniit pituttorneqarsimanngilaq, taamaattumillu Naalakkersuisunut ilaasortaq aallaavittut taamatutaaq ataatsimeeqatigeeriaatsinut taakkununga marlunnut tamanut piareersartariaqarluni. Taamaakkaluartorli ataatsimiititaliamut iluaqutaasinnaasutut

isumaqarfigineqarpoq Naalakkersuisunut ilaasortaq arlaatigut paasitinneqarpat ataatsimiititaliami ataatsimiinnissami aggersumi suna naatsorsuutigineqarsinnaansoq.

Aalajangersakkami oqaaseqatigiinni kingullerni maannamut allanneqangitsumik periaasiusimasoq malittarisassanngortinneqarpoq, taanna malillugu Naalakkersuisunut ilaasortaq sapinngisamik piffissaalluartillugu siunersuinerup ingerlanneqarnissaa paasissutissiiviusumillu ataatsimiinneq ataatsimiititaliamit aggersaavigineqarsimasoq *ingerlanneqartinnagu* ataatsimiititaliamut saaffiginnissuteqassalluni, Naalakkersuisunut ilaasortap kissaatiguniuk atorfilittanik ataatsimit amerlanerusunik ingiallorteqarnissani.

Nr. 8-mut 9-mullu

§ 36, imm. 1 allanngortinneqarnissaanut siunnersuut pisussaaffiliivoq apeqquteqaat aallaavigalugu siunnersuutit siunissami Inatsisartut oqaaseqaatissaannut siunnersuummik ilaqartinneqartalissammata. Tamatuma malitsigisaanik § 36, imm. 4-p allanngortinneqarnissaa siunnersuutigineqarpoq. Maannamut malittarisassat malillugit § 36, imm. 4 periarfissaqartitsereerpoq Inatsisartunut ilaasortat partiillu apeqquteqaatip isumaqatigiinniutigineqarnerani inatsisartut oqaaseqaatissaannut siunnersuuteqarsinanannermut. Periarfissarli taanna ulluinnarni sulinermi annerusumik pingaartinneqartarsimangilaq.

Allanngortitsinissamut siunnersuutigineqartumut tunuliaqutaavoq Siulittaasoqarfik kissaateqarmat Inatsisartuni apeqquteqaat aallaavigalugu oqallinnerit pitsaassusiisa qaffassarneqarnissaat. Itisiliinissamut nalinginnaasumik nassuiaatini imm. 2.8 innersuussutigineqarpoq.

Siunnersuut malillugu § 36, imm. 1-imi ilanngunneqarpoq apeqquteqaat aallaavigalugu oqallinnissamut siunnersuutit ”Inatsisartut oqaaseqaatissaannut siunnersuummik ilaqartinneqartassasut”. Aalajangersagaq piffissaq iluatsillugu oqaaseqatigiinnut marlunnut avinneqarpoq atuaruminarneroqqullugu. Aalajangersakkap allatigut imarisai allanngortinnagit ingerlateqqinneqarput.

Apeqquteqaat aallaavigalugu oqallinnissamut siunnersuutit Inatsisartut oqaaseqaatissaannut siunnersuummik ilaqartinneqarnissaannik piumasqaat naammassineqareersimasassaaq apeqquteqaat Inatsisartut siulittaasuannut tunniunneqarpat, tassa immikkoortup Inatsisartunut nalunaarutigineqarnerani.

Oqaaseqaatissatut siunnersuutigineqartoq Naalakkersuisunut peqqussutitut piumasqaatitulluunniit oqaasertalerneqarsimassanngilaq, § 33 naapertorlugu aalajangiiffigisassatut siunnersuunit ilisimaneqartutut, oqaaseqaat aalajangernertut Naalakkersuisunik pituttuisutut pissuseqarsinnaanngimmat. Akerlianik oqaaseqaat

isummamik ersersitsinertut ilusilerneqassaaq, oqallinneq ingerlanneqarsimasoq tunngavigalugu Inatsisartuni amerlanerussuteqartunit akuersissutigineqartussaq. Taamaattumik oqaaseqaatissatut siunnersuutit ima oqaasertaliinermik aallartittariaqarput ”*Inatsisartut isumaqarput ...*” ima aallartitagatik ”*Inatsisartut kissaatigaat ...*” il.il.

Taamaattumik oqallisigitinniarneqartoq oqaaseqaatissatullu siunnersuut massakkorpiaq pisunut il.il. aalajangersimavallaartumik sammisinneqartariaqanngilaq, akerlianilli inuiaqatigiit ineriartorneranni nalinginnaanerusumik ilisarnaatit oqallisigitinneqartariaqarlutik. Inatsisartut oqaaseqaatissaannut siunnersuut taamaalilluni sakkussaassaaq inuiaqatigiit ineriartortinneqarnerannut ataatsimut isummernissamut oqallinnerup saatinneqarnissaanut.

Oqaaseqaatip Naalakkersuisunut pituttuisuusinnaannginneranut tunuliaqut eqqarsaatigalugu nalinginnaasumik nassuiaatini imm. 2.8 innersuussutigineqarpoq.

§ 36, imm. 4, imm. 1 naapertorlugu malitsitut iluarsineqarnissaa siunnersuutigineqarpoq, taamaalilluni maannamut inatsisartut oqaaseqaatissaannut siunnersuuteqarsinnaaneq allanngortinneqassalluni (maanna pinngitsoorani) inatsisartut oqaaseqaatissaannut allannguutissatut siunnersuuteqartoqarsinnaanngortillugu.

Maannamut suleriaasiumik nangissutitut Inatsisartut oqaaseqaatissaannut allannguutissatut siunnersuutitut allannguutissatut siunnersuuteqarnerup (malitsitut allannguutissatut siunnersuuteqarneq), oqaaseqaatip pituttuisuunnginnera eqqarsaatigalugu aamma ataatsimiinermik aqutsisup paatsiveqartumik taasisitsinernik ingerlatsinissamut periarfissaqarnissaa eqqarsaatigalugit, pisinnaasariaqanngilaq.

§ 36, imm. 1 naapertorlugu inatsisartut oqaaseqaatissaannut siunnersuut amerlanerussuteqarfigineqarsinnaanngippat, taamatullu aamma imm. 4 naapertorlugu oqaaseqaatissatut siunnersuut allanngortitaq amerlanerusseqarfigineqarsinnaanngippat, isumaqatigiinniineq § 50-imi malittarisassaq malillugu akuersissuteqarfiunngitsumik oqallisigineqaqqinnanilu naammassineqarsinnaavoq. Maannamut aalajangersakkamut tassunga imm. 4-mut ilaatinneqartumut innersuussuteqartoqarsimannngilaq.

Taamatuttaaq periarfissaqassaaq § 51-imi malittarisassaq malillugu oqaluuserisassani immikkoortumut tullermut ingerlaqqinnissamik siunnersuuteqartoqarsinnaassaaq, § 36, imm. 4-mi suli innersuussutigineqartutut.

§ 52-imi malittarisassamut § 36, imm. 4-mi innersuussineq attatiinnarneqassaaq, taamaalilluni oqaluuserisassani immikkoortumut tullermut ingerlaqqinnissamik siunnersuut Naalakkersuisunut imaluunniit Naalakkersuisunut ilaasortamut ataatsimut tatiginninnginnermik tunngavilersorneqarsinnaalluni. Tatiginninnginnermik taamatut

oqaaseqaatip akuerineqarnerata malitsigissavaa Naalakkersuisut, Naalakkersuisut siulittaasuat imaluunniit Naalakkersuisunut ilaasortat pineqartut ataasiakkaat Inatsisartut Naalakkersuisullu pillugit Inatsisartut inatsisaanni § 27 naapertorlugu atuuffimminniiginnarsinnaajunnaarnerat. Tamanna maannamut inatsisitigut pissusiusimasunut naapertuulluinnarpoq, tassani apeqquteqaat aallaavigalugu oqallinnerit atorneqarsinnaasimmata Naalakkersuisunut il.il. tatiginninnginnermik oqaaseqaatissatut siunnersuummik saqqummiussinissamut.

Nr. 10-mut

§ 38, imm. 5-tut siunnersuutigineqartoq Inatsisartut Suleriaasianni 1999-imeersumi (taamanikkut § 37, imm. 5-tut allassimasumik) 2001-imilu atorunnaarsinneqartumik siusinnerusukkut aalajangersarneqarsimasumik allaqqiineruvoq. Aalajangersakkap atuutilerseqqineranut tunuliaqutaasut nalinginnaasumik nassuiaatini immikkoortoq 2.9 innersuussutigineqarpoq.

Naalakkersuisunut Inatsisartunullu ilaasortanit siunnersuutit Inatsisartut ukiuata naanerani inaarutaasumik akuersissutigineqarsimannngitsut atorunnaartartut aalajangersakkami aalajangerneqarpoq. Inatsisartunut ilaasortanit apeqquteqaatinut apeqqutinullu, Inatsisartut ukiuata naanerani inaarutaasumik suliarineqarsimannngitsunut tamanna aamma atuuppoq.

§ 38, imm. 1 naapertorlugu Inatsisartut ukiuata naanerani siunnersuut atorunnaaraangat siunnersuut kingusinnerusukkut saqqummiunneqaqqissagaluarpat, taava Inatsisartut siunnersuummik suliarinninnertik aallaqqaataaniissavaat, taamaattoqartillugu siunnersuut Inatsisartut inatsisissaattut siunnersuutaasimappat iml. Inatsisartut Suleriaasiannut siunnersuutaasimappat Inatsisartunit suliarineqarnera aallarteqqissaaq, t.i. siunnersuut pingasoriarlugu suliarineqassaaq, naak assersuutigalugu Inatsisartut ukiuata siuliani siullermeerneqarsimagaluarpalluunniit.

Taamaattorli siunnersuutip saqqummiuteqqinnerani siunnersuut naalakkersuinikkut tapersorsorneqartussatut ilimanaateqanngippat suliassat killeqassapput, tak. tamanna pillugu § 9-mut allannguutissatut siunnersuut, tamatumalu kingorna siunnersuutit taamaattut Inatsisartut ataatsimiititaliaanni attuumassutilinni tunulliutsinneqarsinnaassallutik.

Kiisalu § 38, imm. 5, oqaaseqatigiit aappaannut siunnersuut malillugu Inatsisartunut ilaasortanit apeqquteqaatit suli inaarutaasumik Inatsisartut ukiuanni suliarineqarsimannngitsut peerneqassapput.

Inatsisartut ukiuanni aggersumi siunnersuut attatiinnarniarneqarpat tamanna pisinnaassaaq siunnersuuteqartup ukiakkut ataatsimiinnissamut siunnersuutitinnit tunniussivissaaq sioqqullugu Inatsisartut Siulittaasoqarfiannut tamanna nalunaarutigippagu. Taamatutaaq ataatsimiititaliaq

siunnersuummik suliarinnittussatut innersuussutigineqartoq Inatsisartut Siulittaasoqarfiannut qinnuteqarsinnaassaaq siunnersuutip attatiinnarneqarnissaanik, aamma Inatsisartut ukiuanni tulliuuttumi. Suleriaatsit tamakku inatsisartoqarnikkut suleriaatsinut atuuttunut annerusutigut naapertuuppoq.

§ 38, imm. 6-imut siunnersuutikkut ukiumoortumik Nunatta Karsiata Naatsorsuutaasa akuerineqarnissaat maleruagassani imm. 5-imi siunnersuutit Inatsisartuni inaarutaasumik akuerineqarsimangitsut atorunnaartarnerat pillugu aalajangersakkamut ilaannginnissaa isumannaarneqassaaq. Taamatut ilaatitsinnginnikkut maannamut periaaseq tassa upernaakkut katersuunnermi siullermeerisarneq ukiakkullu katersuunnermi aappassaaneerisarneq naammaginatsumik atorneqarsimasooq imaaliiallaannaq periarfissaaginnassaaq. Taamaallilluni ullormut oqaluuserisamat tassunga tunngatillugu isumaliutissiissutip Inatsisartut ukiuanni nutaami saqqummiunneqarsimanissaa Inatsisartut Suleriaasiatigut isiginiarneqassaaq, tamannalu siunnersuutitut allanut atatillugu naatsorsuutigineqarsinnaanngilaq, tak. nalinginnaasumik nassuiaatini immikkoortoq 2.9.

§ 38, imm. 6-imi aalajangersagaq toqqaannartumik iml. nalogiimmik siunnersuutitut allanut atorneqarsinnaanngilaq, taamaallaalli Nunatta Karsiata Naatsorsuutaasa akuerineqarnissaat pillugu Siunnersuummi.

Nr. 11-mut

§ 40, imm. 1 malillugu Inatsisartunut ullormut oqaluuserisassanik nalunaaruteqarnissamut nalinginnaasumik piffissaliinermi apeqquteqaat aallaavigalugu oqallinnissamut siunnersuutit ilaatinneqanngillat, tak. § 36. Siunnersuummut tassunga tunuliaqutaasut pillugit nalinginnaasumik nassuiaatini immikkoortoq 2.10 innersuussutigineqarpoq. Siunnersuutikkut Inatsisartunut ilaasortat Siulittaasoqarfiimmuut ataavartumik apeqquteqaatinik nalunaaruteqartarsinnaanerat periarfissinneqarpoq, tamatumalu kingorna apeqquteqaat nutaanngilisunnginnerani Inatsisartunilu oqaluuserineqannginnerani piffissaalluartillugu immikkoortoq Siulittaasoqarfiup oqaluuserisassanut ilanngunniarsarissavaa.

Taamaattorli siunnersuut ima siusitsigisumik oqaluuserissanut ilanngunneqassanngilaq, allaat Naalakkersuisut apeqquteqarfigineqartut akissuteqarnissaminnut piareersarnissamut periarfissaqartinnagit. Taamaattumik apeqquteqaat aallaavigalugu oqallisissiat aatsaat nalunaarutigineqarnerminnit sap. akunnerata ataatsip qaangiunnerani siusinnerpaamik Siulittaasoqarfiup ilannguttassagaa naatsorsuutigisariaqarpoq.

Siunnersuuteqartup aamma maluginiassavaa, katersuunnerup naggataatungaani oqaluuserisassat amerlanerusut ilanngunneqarnissaat pillugu piffissamik naleqquttumik nassaarnissaq ajornakusoorsinnaasarmat. Taamaattumik Siulittaasoqarfiup isummerfigisariaqarpaa, apeqquteqaat aallaavigalugu oqallisissiat katersuunnerup nalaani

kingusissukkut nalunaarutigineqartut, katersuunnermi tassani oqaluuserisassanut ilanngunneqarsinnaanerit angumerineqarsinnaanersut.

Nr. 12.-mut

§ 43, imm. 3-mut siunnersuutikkut maanna aalajangersagaq allangortinneqarpoq, taamaalilluni ataatsimiinnermik aqutsisoq Inatsisartut akuersissuteqartinnagit ullormut oqaluuserisassat tulleriaarnerisa allangortinneqarnissaannut piginnaatinneqarluni. Allanguutit taamaattut § 4, imm. 1 malillugu ullormut oqaluuserisassanut nassuiaat pillugu isumaqatigiinniarnermi tunngavilersuutaasinnaanginnerannut ersarissaaniarneq allanguinnermi siunertaqarpoq. Siunnersuummut tassunga tunuliaqutaasut pillugit nalinginnaasumik nassuiaatini immikkoortoq 2.11 innersuussutigineqarpoq. Peqatigisaanik imm. 3-mi erseqqissaatigineqarpoq, ataatsimiinnermi aqutsisup oqaluuserisassani immikkoortoq ullormi ataatsimiiffiusumi oqaluuserisassanit peersinnaagaa. Tamanna maannamut atuussimavoq, taamaattorli periarfissaq § 43-mi toqqarlugu taaneqarsimanngilaq.

Imm. 3 malillugu allanguinerit “pissutissaqarluni” pisassasut erseqqissarneqassasoq aamma siunnersuutigineqarpoq. Tamanna oqaluuserisassatut immikkoortut tulleriaarnerinik allanguinissamut aamma oqaluuserisassatut immikkoortup peerneqartariaqarnerani aalajangiinnermut atuuppoq. Oqaasertaliussaq “pissutissaqarluni” ima paasineqassaaq, allanguineq il.il. suliamut tunngasuteqartut isiginiarlugit tunngavilersorneqassasoq, ataatsimiinnermilu aqutsisut naalakkersuinikkut arlaannaannulluunniit atanngitsutut pissusilersornissaannik naatsorsuuteqarnermi taamaallaat naalakkersuinikkut periaaseq imaluunniit qinngasaarineq tunngavilersuutaassanngitsoq.

Pissutissaqarluarneq assersuutigalugu pisinnaavoq aalajangiiffigisassatut siunnersuut pillugu siunnersuuteqartoq ataatsimeeqataasinnaasimanngippat siunnersuulluunniit parteeqammit saqqummiunneqarsinnaasimanngippat, assersuutigalugu kisiartatut qinigaasimasooq pineqarsimassappat. Assersuut alla tassaasinnaavoq Naalakkersuisunut ilaasortap attuumassutillip § 36 malillugu apeqquteqaat akissuteqarfigisinnaangippagu, taamaattumillu apeqquteqaat aallaavigalugu oqallinneq kinguartinniarnepat. Taamaattoqartillugu ataatsimiinnermi aqutsisut immikkoortoq pineqartoq suliamut attuumassutilimmik ullormut oqaluuserisassanit peernissaanut tunngavissaqarpoq, iml. piffissami tassani piumasarineqartutut takkunnissaq periarfissaasutut naatsorsuutigineqarpat tulleriaarnermi kingullerpaatut ilanngunneqarsinnaalluni.

§ 43, imm. 4 ingerlatiinnarneqassasoq siunnersuutaavoq, oqaluuserisassanut immikkoortunik nutaanik ilanngussinissamut aalajangiineq ataatsimiinnermi aqutsisup isumagissagaa erseqqissaatigineqarluni, naak Inatsisartunit akuersisoqareertinnagu maannamut taamatut aalajangiisoqarsinnaangikkaluortoq. Taamatut sivikitsumik piffissaliilluni allanguinnermi

iluaqutaasut pisariaqartulluunniit ajoqutinit naapertuinerunersut pillugit Inatsisartunut ilaasortat amerlanerussuteqartut isumaqataanissaat maleruagassami tassani isumannaarneqassaaq. Ajoqutit sualummik tassaasinnaapput, oqaluuserisassani immikkoortumut nutaamut ilaasortat pitsaanerpaamik piareersimasinnaanerisa naatsorsuutigineqarsinnaannginnera.

Pissusiviusutigut oqaluuserisassanut immikkut ilanngussinermut aalajangiineq taasisutigineqartariaqanngilaq, ilanngussinermummi ilaasortanit akerliliisoqanngippat ataatsimiinnermi aqutsisup Inatsisartut akuersinerat tunngavilersuutigisinnaammagu. Taamaattorli ataatsimiinnermi aqutsisoq oqaluuserisassap nutaap ilanngunneqarnissaa pillugu taasinissamik piunasaqarsinnaavoq, aamma ilaasortat isumaannik erseqqissaateqarnissamut oqaatsitigut nalunaarnerit ataatsimiinnermi aqutsisumit akuerineqarsinnaapput. Taamaattorli nassuiaatit siunnersuut pillugu isumaqatigiinniarnissamut Inatsisartunut ilaasortat piunasaqarsinnaanngillat, tak. Suleriaatsimi § 4, imm. 1. Apeqqut pillugu ilaasortat akornanni isumaqatigiinngilerneq paasinarsippat, ataatsimiinnermi aqutsisup oqaluuserisassanut immikkoortup nutaap ilanngunnissaanik siunertaqarnini tamatuma kingorna unitsissinnaavaa. Aamma ataatsimiinnermi aqutsisup oqallinnerup ingerlaannarnissaa unitsissallugu taasisitsinikkut toqqarsinnaavaa, taamaalillunilu ilanngussassap siunnersuutigineqartut akuerineqarnissaanut akuerineqannginnissaanulluunniit Inatsisartut piareersimanersut paasisinnaassallugu.

Nr. 13-imut

Maannamut periaaserineqartartoq malillugu Inatsisartut oqallinnerisa nalaani oqaaseqartartut tullerriaartarnerat aalajangersakkami erseqqissarneqarpoq. Erseqqissaammut tunuliaqutaasoq nalinginnaasumik nassuiaatini immikkoortoq 2.11-mi erseqqissaatigineqarpoq. Oqaaseqatigiinni siullermi maannamut § 48, imm. 1-mi aalajangersagaq attatiinnarneqarpoq, tassani pineqarlutik oqaaseqarnermi piffissaliussat pillugit Suleriaatsimi ilanngussaq (siunissami Ilanngussaq 1), pineqartoq tassaalluni oqaaseqartartut tullerriaarneri. Ilanngussami oqalliseriaatsit assigiinngitsut qanoq ingerlanneqarnissaat tigussaasumik isummerfigineqarpoq.

Oqaaseqatigiit aappaat pingajuallu ilanngussaq malillugu oqaaseqartartut tulleriinneri aalajangerneqarsimanngikkaangata taamaallaat atuuttarput. Partiit sorliit oqaasertartui siulliullutik oqaaseqartariaqarnerisut nalornissutigineqarpat, Inatsisartuni partiip amerlanerpaanik ilaasortaaitallip oqaaseqartartua oqaaseqartussanik tullerriaarnermi aallartissaaq. Tassunga atatillugu ilaasortat piffissami pineqartumi Inatsisartuni pissutsit malillugit kisinneqartarput, taamaalillunilu partiimut attuumassuteqarnerup allanngornera ima kinguneqarsinnaalluni, partiimut allamut nuunneq pissutigalugu partii ilaasortamik annasaqarsimasooq oqaaseqartartut tullerriaarneranni il.il. tulliuttutut nikisinneqassalluni.

Piffissami pineqartumi partiit ilaasortaataa amerlassusiat naapertorlugu oqaaseqartussat tullerriaarneri allat periaaseq taanna aallaavigalugu aalajangerneqartarput. "Partii" tassunga atatillugu ima paasineqassaaq, partiivittut pilersinneqarsimasut, kattusseqatigiit, aamma ilaasortat ataasiakkaat attaviitsullu. Akerlianilli partiit allatut peqatigiinnerat iml. suleqatigiinnerat oqaaseqartussat tullerriaarnerannut kinguneqassanngillat.

Partiit marlut ilaasortaataa amerlaqatigiinneranni, Inatsisartunut kingullermik qinersinermi partiimut oqaaseqartarpoq amerlanerpaanit qinerneqarsimasooq siulliulluni oqaaseqassaaq. Taamaalilluni oqaaseqartussat tullerriaarnerinut taamani pisortatigoortumillu qinersinermi angusaq aalajangiisuussaaq, ilaasortallu qinersinerup ulluani attuumassuteqarfigisaa allaanerusimasuuppat qinersinermi angusaq aalajangiisuunani.

Nr. 14-imut

§ 48, imm. 3-mi siunnersuutigineqarpoq oqaaseq "ilanngussami" allanngortinneqarpoq "Ilanngussaq 1"-mut. Ilanngussaq pineqartoq oqaaseqarsinnaanermut piffissarititanut tunngavoq.

Allanngortitsineq suleriaatsip siunissami ilanngussanik marlunnik imartussaaneata malitsigisaanik iluarsineruvoq, taamaalilluni ilanngussat normulernerqarnissaat piumasqaataalerluni erseqqissuutitsinissaq pillugu.

Nr. 15-imut 16-imullu

§ 56-imut siunnersuutigineqartukkut Suleriaatsimut Ataatsimiititaliaq pisinnaatinneqarpoq Inatsisartunut ilaasortat namminneq atuuffimminnik inuussutissarsiutiminnillu pinngitsooratik nalunaaruteqartarnissaannut malittarisassanik pituttuisunik aalajangersaanissamut. Taamatut pinngitsoorani paasissutissiinissamik aaqqissuussinerup maannamut nammineq piumasutsimik aaqqissuussinerusimasooq, piffissami kingullermi atuutsinneqarsimasooq suleriaatsimi sukumiinerusumik malittarisassaqtitsinani, taarsissavaa. Taamatut paasissutissiisarnermik aaqqissuussinermut pinngitsoorani paasissutissiisalnissap siunnersuutigineqarneranut tunuliaqutit eqqarsaatigalugit nalinginnaasumik nassuiaatini imm. 2.13 innersuussutigineqarpoq.

Aalajangersakkami imm. 1 malillugu Suleriaatsimut ataatsimiititaliap suliassaraa malittarisassiuutissallugu Inatsisartunut ilaasortat qanoq annertutigisumik Inatsisartut atuuffinnik nalunaarsuiviannut namminneq atuuffitik inuussutissarsiutitillu paasissutissiisutigisassaneraat. Piginnaatitsinerup kinguninngua piaartumik malittarisassat aalajangersarneqarnissaat naatsorsuutigineqarpoq.

Malittarisassat imarisassat eqqarsaatigalugit aallaqqaammut naatsorsuutigineqarpoq taakkua aalajangersarneqassat ullumikkut nammineq piumasutsimik paasissutissiisarnermik



aaqqissuussinermut, nalinginnaasumik nassuiaatini imm. 2.13-imi allaaserineqartumut, naapertuuttumik. Suleriaatsimut Ataatsimiititaliarli iluarsiiisutunik aalajangiisinnaavoq, ass qaqugukkut aningaasatigut soqutigisat ilisimatitsissutiginnissaat il.il. eqqarsaatigalugu aningaasatigut allamik killiliinikkut.

Naatsorsuutigineqarpoq suleriaatsimut Ataatsimiititaliamit malittarisassani paasissutissat qanoq tunniunneqarnissaat eqqarsaatigalugu ilusissanut piumasaqaatinik aalajangersaasoqassasoq. Naatsorsuutigineqarpoq ilusissanut piumasaqaatit aallaqqaammut ullumikkut ilusissanut piumasaqaataasut assigissagaat, ilaasortat ilaatigut atsiornermikkut paasissutissat tunniunneqartut eqqortuussusiat uppersartassallugu. Paasissutissat Inatsisartut atuuffinnik nalunaarsuiviannut ilanngunneqassapput, § 4-lu naapertorlugu tamanit takuneqarsinnaassallutik.

Imm. 2-mi piffissaq Inatsisartunut ilaasortat Inatsisartut atuuffinnik nalunaarsuiviannut paasissutissanik pinngitsooratic tunniussereersimaffissaat aalajangersarneqassaaq. Pissusissamisoortutut isigineqarpoq piffissaliussaq suleriaatsimi namminermi, Suleriaatsimut Ataatsimiititaliap malittarisassiaaniunngitsoq, naalakkersuinikkut sulinermut aningaasatigut tapiissuteqartarnek pillugu inatsisartut inatsisaata allanngortinneqarneranik inatsisartut inatsisissaattut siunnersuut naapertorlugu piffissaliussanik unioqqutitsineq ilaasortamut tapiissutitut tunineqarnissamut aningaasatigut kinguneqartinneqarsinnaammat. Taamaattumik piffissaliussaq Inatsisartunit tamarmiusunit akuerineqartariaqarpoq Inatsisartut Suleriaasiannut allannguutit akuerineqarnerannut atatillugu.

Paasissutissat Inatsisartunut ilaasortap qinigaasinnaanerata akuerineqarnerata kingorna qaammat ataaseq qaangiutsinnagu tunniunneqartarnissaat imm. 2-mi siunnersuutigineqarpoq. Sinniisussali eqqarsaatigalugit piffissaliussaq imm. 3-mi aalajangersarneqartoq atuutissaaq.

Paasissutissanik tunniussinermi naatsorsuutigineqarpoq ilaasortat massakkutut immikkut immersuivissaq Inatsisartut nittartagaanni aaneqarsinnaasoq atortassagaat. Immersuivissap imm. 1-imi malittarisassat malillugit Suleriaatsimut Ataatsimiititaliamit malittarisassiuunneqarnissaa naatsorsuutigineqarpoq.

Imm. 3-mi Inatsisartunut ilaasortanut sinniisussat eqqarsaatigalugit Inatsisartut atuuffinnik nalunaarsuiviannut pinngitsoorani paasissutissiissutissanik qaqugukkut tunniussereersimanissaat aalajangersarneqarpoq. Sinniisussat qinigaasinnaassusiat Inatsisartut inissititernerannut atatillugu akuerineqarsimasariaqanngilaq, taamaattumillu taarsiullugu sinniisussanut paasissutissiinissamut piffissaliussaq siunnersuutigineqarluni pineqartut Inatsisartunut ilaasortanngorneranniit ullunut 30-inut siunnersuutigineqarpoq.

Imm. 3-mi aalajangersagaq taamaallaat atuuppoq sinniisussanut:

- piffissamut aalajangersimasumik sivisussusiligaanngitsumut Inatsisartunut ilaasortanngortunut, imaluunniit
- piffissamut sivikinnerpaamik ullumik 30-nik sivisussusilimmi Inatsisartunut ilaasortanngortunut.

Taamatut malittarisassaqaqtitsinikkut isiginiarneqarpoq sinniisussap naatsorsuutigisariaqarmagu sivikinnerpaamik ulluni 30-ni sinniisussaani, aatsaat tamatuma kingorna pissusissamisoorsinnaamat pineqartoq persaqusersussallugu paasissatinik atuuffinni nalunaarsuivimmi naatsorsuutigineqartunik katersinissaanik. Sinniisussalli pineqartut mattunneqanngillat nammineq piumassutsimik paasissutissiinissaminnut.

Imm. 4-mi erseqqissarneqarpoq Inatsisartut atuuffinnik nalunaarsuvianni paasissutissat Inatsisartut nittartagaatigut tamanit takuneqarsinnaassasut. Taamaalilluni atuuffinnik nalunaarsuviup siunertarpiaa naammassineqassaaq, tassalu innuttaasut paasisaqarsinnaanissaat ilaasortat ataasiakkaat eqqarsaatigalugit soqutigisatigut aporaattoqarnersoq. Naatsorsuutigineqarpoq paasissutissat piffissaliussap imm. 2 aamma 3-mi aalajangersarneqartup naanerata kingorna piaartumik kikkunnit tamanit takuneqarsinnaasalernissaat.

Nr. 17-imut

Siunnersuummi kapitali 13-ini tamarmi ilanngunneqarpoq. Siusinnerusukkut taanna Naalakkersuisunut aamma Inatsisartunut ilaasortat tunuarnerannut sulinngiffeqarnerannullu Inatsisartut aningaasaliissutaat pillugit malittarisassanik imaqaralarpoq. Naalakkersuisunut pissutsit allannguuteqanngillat maannamutullu siusinnerusutut oqaasertalerlugit § 57-imi malittarisassaqaqtinneqarlutik. Naalakkersuisulli Siulittaasuat eqqarsaatigalugu nutaatut ilanngunneqarpoq peqqiilliorneq allamilluunniit pingaarutilimmik pissuteqarluni sulinngiffeqarneq Inatsisartunit aalajangerneqarsinnaasoq, Inatsisartut ataatsimiinnerisa avataanni Naalakkersuisut Siulittaasuata sulinngiffeqarsinnaanerani akuersisarneq Inatsisartut Siulittaasoqarfianiilluni.

Inatsisartunut ilaasortanut pissutsit pisariillisarneqarput, maannamut §§ 56 aamma 58-iusimasut § 58-imi aalajangersakkamut ataatsimut eqikkarneqarmata. Aalajangersagaq taanna maannamut §§-ini 56-imi 58-imilu aalajangersagaasimasunut sanilliullugu annertuumik pisariillisagaavoq, imm. 1-imi aalajangersakkami manna Inatsisartunit sulinngiffeqartarneq najuutinngikkallartarnerlu kiisalu sinniisussanik ataatsimiigiaqqusisarneq pillugit malittarisassat sukumiinerusut, siunissami suleriaatsimut Ilanngussami 2-mi takuneqarsinnaasussat, innersuussutigineqaannarmata.

Inatsisartunit sulinngiffeqartarnermut malittarisassat il.il. Inatsisartut sulinngiffeqartarnermut

malittarisassaasa il.il. ilanngussamut nuunneqarnissaannut tunuliaqutaasut eqqarsaatigalugit, nalinginnaasumik nassuiaatini imm. 2.14 innersuussutigineqarput.

§ 58, imm. 2-mi ilaasortap Inatsisartunit tunuarniuteqarsinnaanera pillugu § 56, imm. 1-imi maannamut aalajangersakkap attatiinnarneqarnissaa siunnersuutigineqarpoq. Aalajangersagaq taanna nalorngissutigineqarsimanngitsoq, siunnersuutigineqarpoq suleriaatsip oqaasertaani attatiinneqarneqassasoq, taamalu Ilanngussaq 2-mi malittarisassaqartinneqarluni.

§ 58, imm. 2, oqaaseqatigiit siulliit, eqqarsaatigalugit aalajangersagaq taamatuttaaq Inatsisartut Naalakkersuisullu pillugit Inatsisartut inatsisaanni § 4, imm. 2-mik allaqqiineruvoq. Inatsimmi aalajangersagaq taanna suleriaatsimit ataqqineqartussaavoq, suleriaatsip inatsit atuuttoq taarsersinnaanngimmagu. Oqaaseqatigiit aappaanni pingajuannilu Inatsisartunut ilaasortanut sinniisussat taamatut inissisimajunnaarniarlutik qinnuteqartarneri pissutsit erseqqissarneqarput. Aalajangersagaq taanna aamma oqaatigineqarsinnaavoq Inatsisartut Naalakkersuisullu pillugit Inatsisartut inatsisaanni § 4, imm. 2-mi malittarisassamik erseqqissaaneruvoq.

Maannamut § 56, imm. 2-3usimasumi kiisalu § 58-iusimasumi malittarisassat suleriaasissap oqaasertaani ingerlateqqinneqanngillaq. Taarsiullugu malittarisassat suleriaatsimut Ilanngussaq 2-mi aalajangersarneqartassapput.

Nr. 18-imut

Aalajangersakkakkut piffissat oqaaseqarfiusinnaasut pillugit maannamut ilanngussaasimasoq nutarterneqarpoq, Inatsisartut suleriaasiannut Ilanngussaq 1-imi taaguuteqalerluni. Ilanngussamut tassunga innersuussinerit siunnersuut malillugu § 48, imm. 1 aamma 3-miipput.

Ilanngussamut 1-imut allannguutissatut siunnersuutit kiisalu tamanna pillugu Siulittaasoqarfiup isumaliutai nalinginnaasumik nassuiaatini, imm. 2.15-imi, itisilerneqarput.

Nr. 19-imut

Aalajangersakkakkut Inatsisartut suleriaasiat Ilanngussaq 2-mik nutaamik annertusineqarpoq ”Inatsisartunit sulinngiffeqarallartarneq najuutinngikkallartarnerlu kiisalu sinniisussamik aggersaasarneq pillugit Inatsisartut malittarisassaat”-nik imalimmik. Siunnersuut malillugu suleriaatsimi § 58, im. 1-imi ilanngussamut tassunga innersuussisoqarpoq.

Ilanngussap 2-p imarisai kiisalu tamanna pillugu Siulittaasoqarfiup isumaliutersuutai nalinginnaasumik nassuiaatini, imm. 2.14-mi kiisalu allannguutissatut siunnersuummut matumunnga Ilanngussaq 3-mi, sulinngiffeqartarneq il.il. eqqarsaatigalugit malittarisassatut siunnersuutitut ataasiakkaanut oqaaseqaateqarfiusumi, itisilerneqarsimapput.

*§ 2-mut*

Aalangersakkami tassani aalangersarneqarpoq Inatsisartut suleriaasiata qaqugu  
atuutilernissaa siunnersuutigineqarnersoq.